

續真
聖今
寶

貴陽熊氏藏板

光緒戊子秋余校刊黔史既成同年鄧君花溪見而善之謂前此田蒙齋中丞著有黔書久刊行世近時黎純齋先生復校刊黔記刊甫成由陳衡山携赴海外廣爲流傳衡山之兄嵩山庶常又將選刻黔詩聞在都門開雕有日矣今子更作是舉黔之文獻庶幾粲然大備足資叅考顧所見尙不止此嘉道間武威張介侯先生來宰吾黔作續黔書其文奧博典贍凡黔之草木山川人材土物一經藻績皆足以發其菁英蓋先生負英偉之才具深沉之識其才智足與田中丞相埒故其爲書亦與黔書相類而尤足以補黔書之所不及惜世無專行本子盍更梓而行之余深幸同志之有人因念是書曩在京師雖經目睹然一則附在先生養素堂文集一則列入粵雅堂叢書中未便携以

續黔書叙

歸黔黔中別無專行本卽欲梓之烏從而梓之乃徧覓於年家至好處適年丈唐子上秘藏鈔本一册待刊未果爰從索借重加檢閱校付梓人刊成將合黔書黔史黔記而並爲一函以求爲吾黔之文獻足徵云爾至先生著作之富文章之妙路潤生先生爲作養素堂文集序已詳言之無俟乎余之贊頌余亦不敢復贅焉光緒十五年仲春月上浣貴陽熊湛英序

續黔書自叙

明李樾著全黔紀畧一卷郭子章著黔中止權記一卷黔記六十卷黔小志一卷斧藻其辭頗可觀覽

國朝德州田霞綸先生撫黔日著黔書四卷多取材黔記余是書體例約倣田氏初名黔中紀聞今改曰續黔書出以正當世洪秀偉彥之君子闕逢困敦仲夏之五日武威張澍書

續黔書叙

續黔書目錄

卷一

星野

地界

修文昌宮記

捍水議

苗警

驛站

夫馬

題驛壁

九月開徵

續黔書目錄

治盜

治蠱

假銀

詛盟

茂學

卷二

三間大夫

竹王

莊豪

馬王

黑神

北陰神

柴冲大王

李白至夜郎辨

懷白亭

謁王陽明先生祠記

十八先生墓

盤瓠

紫姑

卷三

黔中

夜郎

龍標

廢牂柯郡

牂柯江

羅甸

八番

銅仁

句漏洞

卷四

萬卷書巖

游紫氣山記

游東山記

續黔書目錄

重游東山記

飛鳳山

游白雲山記

梵淨山

飛雲巖

黔靈山

游牢砢洞記

鮎魚洞

諸葛洞

相見坡

聖泉

卷五

多雨

歧舌

醫方刻石

石刻

俗字

川字

生六男

化虎

咒尸為魚

石棺

續黔書目錄

人疴

風鬼

瓜龍

鐘鬪

馬化石

雷擊六

卷六

鹽

茶

女酒

革器

續黔書目錄

洞錦

鐵笛布

金星硯

苗刀

燕麥

羊肚菌

降真香

卷七

梓枏

粗

邛竹

重臺蓮

蘭

長壽草

朱草

海棠

蠟樹

卷八

孝獸

豪雉

水馬

小羊

續黔首錄

箐雞

人首魚

鱸魚

小鱉

圓蛇

唧唧

九香蟲

續黔書卷之一

武威張 澍壽穀著

貴陽熊湛英露階校刊

分野

漢武帝設益州轄越巂犍為牂柯三郡越巂屬滇犍為屬蜀牂柯所隸二十四邑今貴陽以上皆其地也陳卓謂牂柯入參五度而班固謂東井與鬼秦之分野西南牂柯越巂二州皆宜屬焉則自平越以上其為參井無疑常璩華陽國志云牂柯上當天井沈思克獨以鎮遠銅仁思州黎平為柳星之餘夫全楚之分沅湘長沙武陵桂陽零陵以及白帝房陵南郡江夏皆分翼軫黔實近楚則思州思南銅仁鎮遠石阡黎平六府當為翼軫之餘也

續黔書卷一

地界

玉屏舊屬楚衛田止軍屯自 國朝雍正五年裁衛設縣始隸黔劃麻沅兩屯歸楚僅存一平屯分為兩甲一甲二十戶二甲十三戶共三十三戶亦甚畸零矣而田疇或屬於楚之荒或屬於銅仁或屬於思州或屬於青谿毋亦非分疆畫井之道乎然予稽察輿圖不獨玉屏也黔之州縣皆然有所屬鄉邨去治三四百里者有城門之外即為鄰屬者有此州之地併入他縣他縣之地併入此州者又有管轄之地中多隔越或距境一二百里或隔三四州縣而地丁名糧亦隸於他縣者又有衛所之屯與民地相連浸久而迷其版籍者遇有審訊案件提拘不至則曰我某縣籍也及於某縣有犯則又曰我某縣籍也盜賊之

越貨禦人有司者捕之輒歛忽往來莫可踪跡適足以敷奸誨
逋雖有保甲不能行也甚則越佃占水訟牒不已至於爭鬪殺
傷事變胡可勝言周禮形方氏掌制邦國之地域而正其封域
無有華離之地誠使今日有留心國計之大吏繪圖入
告爲之改其幅員均其大小正其錯互清其軍民吾知地邑民
居必參相得有司亦獲以盡其撫綏之方則訟獄息而風俗淳
矣昔子輿氏告戰國之君猶以爲經界不正則井地不均穀祿
不平然則正經界固仁政之首務哉

修文昌宮記

今

上卽位之四年九塗榮鏡六幕同文猶復崇儒重道加意菁莪

續黔書卷一

爰

允儒臣之請於畿甸首善之區建宮以祀文昌仍

沛綸音飭十三省大吏董率所屬於府州縣各建宮虔祀並
頒祝告之祠用妥神靈凡以誕敷文德樂育子衿潛化頑悍躋
治淳熙之至意也歲壬戌余改官玉屏視事後簿書稍暇巡覽
郊垌見屏山東有文昌閣敗瓦飄零殘椽傾圮將委諸蔓草荒
烟慨焉興嘆思有以新之以培風脈而地衝差繁後竭蹶力
弗能舉適邑紳士咸欲捐資重建且謀卜地城內以便歲時用
享原任綏陽鄭廣文洪孝廉竝文學諸君造余以碑記請且謂
余之不鄙夷其地而樂與敷衽講藝也費序子弟莫不爭先淬
礪思執衿道德之囿按轡文雅之場倘更得昌言以啟其牖不

獨親炙之不安於咫聞斬有以規於遠大卽後來者聞風興起
順就甄陶不至偃矩改錯亦所以成埏埴之志也余曰然仍進
諸君而論之曰凡人之學學爲忠孝而已忠孝根於性生而亦
本於經術黔雖介在荒服文采風流遠遜函夏然漢時尹珍自
返鄉里教授西南由是知學孝桓時尹氏以經術選用厯尙書
丞郎荊州刺史而應奉爲司隸校尉師生並顯明代如馬氏心
菴陳氏五粟研鑽理窟克紹關洛之傳而清平孫文恭思南李
少參篤學超詣鴻文經世爲時所宗夫以獠狃之中卓然崛起
功業文章流芳汗簡而微言懿旨復有以啟後人之靈府豈非
聖賢非異人任而學之可幾哉至於崇祀邀福謂可以登桂籍
而應仕版非余之所期望也眾曰然遂叙此言以記之

捍水議

玉屏雖最爾邑爲黔門戶扼楚咽喉形勢據其衝要而城濱大
江每多水患勝國天順二年隆慶三年天啟元年屢被衝決入
國朝康熙二十七年五十九年乾隆元年二十一年四十四年
竝遭洪流民居蕩析近者值雨澤浸多水輒至中衢余承乏之
五月陰雨日久澗江暴漲驚濤雷吼水不入閘者僅尺許心甚
憂之蓋江流自清浪入熊溪城西有獅子峰雄踞江口水無所
洩其怒北有鎮平玉屏兩山作障則水不得不折而東而城當
其衝下流則書巖蓮峰隔江夾峙碕岸旣狹疏瀉未易勢亦逾
奮迅倘山潦橫溢則水必不能驅山以行而與城爲難矣是吾

無止水之防而非水自潰其防也吾無容水之地而非水據吾之地也移城以避之則費巨費巨則庸愚駭委城以與之則殃民民殃則蒼旻怒且如國家設有司之謂何暇日步郊坳相地勢思有以捍之議自北門至館驛取江中巨石砌之爲塘高一丈仍於土石堆積之處掘之以壯江身俾廳而有容用工不過百人爲期不過一月則居民可免淪胥之患陽侯不得憑汎濫之威矣會余調署遵義不果行姑存其議以俟後之克舉者

苗警

楚南鎮筇與黔之銅仁接壤菁深地阻蠢苗蠡聚性剽悍甚攻鬥劫殺無日無之每煽爛銅苗輒與之犄角壬戌年穀不登越貨於路塗之人咸裹足焉屆歲莫鳩合醜類刑牲壯穆廟號其

續書卷一

四

魁爲大玉期以正月十六日犯銅仁玉屏與銅密邇汎兵五十前撥三十駐正大營存者僅二十耳城垣傾頽無巖疆足守邑之人讐於竹山之役

嘉慶二年事

咸瞿瞿焉驚余謂屏邑雖小苗不

足憂也龍塘當邛水之衝界牌扼鬼廬之要地險旣得防守斯宜城北六十里之蠟巖苟選鄉兵數百占護山梁則銅仁施溪六洞水銀等山之苗不能至城南六十里之壩坪苟選鄉兵數百碁布澗谷則南路革溪天塘之苗西路新溪南洞之苗至則授命北有平江鴻流溯盪不可以厲檄漁人而藏其舟楫苗豈能飛渡耶余旣以解父老之惶惑方欲召募壯勇部署糗糧執挺以爲白徒先會鳳凰廳傅司馬率健兒至誘其渠擒之餘各鳥獸散矣聞往者荆蠻之叛黃瓜寨掘地得古碑有火龍飛入

黔南地二月興工八月休之讖既而狎苗起興義延蔓數郡縣掘壙焚人大肆荼毒合楚師勦之乃定歲月悉符茲幸天奪蠻魄虬毒未斂吾亦固吾圉耳藉使木札羣飛布巾爭舞銅之苗觀釁颯起而清江台拱之九股復響應之上覆飛鳥下不見伏免勢必燎原誰其捧海當事無李化龍郭子章諸公其何以釋冰強變卧鼓安邊以紓九重宵旰之憂哉

驛站

黔之地跬步皆山上則層霄下則九淵其驛站之苦有萬倍於他省者如貴陽之東至湖廣玉屏以至青溪五十餘里中有橋頭坡三家橋坡青溪至鎮遠九十餘里中有焦溪坡梅溪坡白

續黔書卷一

五

羊坡鎮遠至偏橋五十餘里中有沿沙坡乾溪坡谷定坡施秉至清平九十餘里中有鬼門關坡黃猴坡小觀音坡大觀音坡落蹬坡中隔一重安江清平至平越八十餘里中有臘梅坡三十三坎坡楊老坡羊場坡三郎坡葛橋坡平越至新添驛一百餘里中有五聖關坡倒馬坡虎場營坡酉陽坡黃絲坡猓獾坡打杆坡望城坡又如貴陽之西至雲南查城驛以至安南驛一百餘里中有梅子坡黃土坡北極觀坡盤江河盤江坡保甸坡哈馬坡安南至新興站九十餘里中有馬跑泉坡烏鳴坡腊茄坡江西坡泥納坡新興至普安驛八十餘里中有望城坡羅漢坡爛橋坡鸚哥坡軟橋坡舊普安坡鉉壇坡倒馬坡或石如狼牙或峯如劍鏑或陡如立壁或行如穿雲又或盤旋屈曲鳥道

羊腸又或嶽嵒巖葉魚鳧蠶叢見者駭魄聞之休心然皆顯著
奇坡而無名峻嶺不計也今雖於重安楊老新安各設腰站以
紓下游馬力於毛口楊松列當各設腰站以紓上游馬力又將
上游舊設之盤江江西坡二驛裁去以關嶺查城尾灑新興軟
橋湘滿六驛改設於新路之坡貢郎岱列當確子窑楊松劉官
屯又裁下游黃絲一驛移平越驛於酉陽塘而亦非坦塗馬之
報勞傷墜死者殆無虛日矣蓋每驛額馬僅五十匹夫僅一百
名每馬日支稻穀僅五倉升草一束每夫日支米僅一倉升銀
一分五釐是以馬不能飽秣則無以致遠人不能果腹則無以
應役又况古人驛馬三十里一置驛多則行速而馬不弊後人
持節費之說歷次裁併至有七八十里而一驛者馬倒官逃又

續警卷一

六

何怪乎

夫馬

屏爲入黔門戶東至湖廣沅州界十里西至思州鎮遠青溪
攬雜界二十五里南至湖廣沅州界三里北至思州府界二十
里東南廣三十五里南北廣三十三里疆域畸零田疇華離彈
丸黑子不得與於芻苢之末而差務繁兼滇黔兩省應站夫
馬俱有司應付並無幫貼攤派但民人瘠貧畜牧甚渺一遇大
差有馬之家往往居奇每匹索價至一兩餘且不能數用又募
雇於湖南之溪洞而差役路資馬主口食咸於官乎取給是一
馬用銀至一兩四五錢也兼之戶口寥落散處山陬附近城市
夫役無多不得不覓之四鄉或離城七八十里或百餘里皆遠

來應募雖官爲給價亦僅依扛抬一日之程其餘往反守候則皆失時廢事不獲價值之日也地方官稍有人心差使卽稠不過苦自賠累而無良之徒且借此以獵民旣賸其脂膏復疲其筋骨良可吁也

附輿夫謠

山劍鏢石狼牙冬暉短郵路賒兩髀腫向前爬口無食身無衣豈樂此忘剝膚破茅屋藿也無菜面孃鳩形婦三歲兒嗷嗷口一思之心搗白雪載塗風吼地嶺逾高防顛墜寒皸疥那敢淚肩若穿足若輓大山坡峽巘多虎跡懼不免晚回歸得百錢買米煮濕薪煙腹未果倦伏眠縣差來勢破壁夢糝糊驚怯魄出符票拴至驛

治盜

續黔書卷一

七

黔之地萬峰林立銳首異軀怪石猙獰狼奔虎視箭簇鎗攢散無統紀又山肥水瘠剛柔數騎逐隊東馳環繞不定生理窘蹙而衣食以禦人倘亦形局使然雖有猛吏銳意追捕迺至不勝犯不勝誅何也聚則抨弓露矢張爪磨牙散則牧犢飲羊鉏犁胼胝皆吾民也又或郊關之外毒箐巉岨我不得而至焉囊篋腰纏委之而去僅以身免厯險衝危踉蹌呼籲於有司弁役疾馳而至則踪影消滅是故始於剝商漸則目無官長始於攫貨近則人茹慘苦何可忍言鹽鐵論曰水有獮狃池魚勞國有彊禦齊民消如之何其聽之也遵義幅幘遼濶統轄十三里每里十六甲煙火輻輳地勢險阻其民慄悍飛詭染楊播之餘習而里甲多巨猾值趁虛日輒聯外來匪人標掠錢貨以爲常余代

庖之日吏民初以余之少也而易之然積聞余在屏聲觀望不敢動然予之治盜以虛不以實每見同僚有獲盜者輒毀折支體飲以鹽酒矐其目竊傷其酷而卒莫之能戢者賊以爲法盡於是吏亦以爲法盡於是役亦以爲法盡於是且議其忍也而不肯捕盜因是益熾余則不然受事日召集里甲訊其素譎者斥之選立誠慤嚴諭之以杜絕飲博謹守堡寨其容留匪類者罪無赦其有警而不協力擒者罪無赦其有被盜而匿不報者罪無赦惟里甲倍償而又於邨鎮關津通衢僻路張示以威刑懼之於是乃不用捕而用偵非不用捕也蓋捕則疏偵則密捕則真盜或走匿而役以局外者當之巨盜或遠颺而役以鼠竊者塞之偵則鳩聚何所肆劫何地黨羽何人起發何期灼然在吾之心目而又虞偵役之給我也復擇役之誠諳者偵之耳目既廣聲色不聞彼宵小者以爲吾之疏之也乃稍稍露跡而偵之者旋至迅發役捕之罔不獲其聚集多人者親率役捕之罔不獲值趁虛之期微服往察之伏壯役於側近有肆奪者卽擒之罔不獲役有不用命及賄脫賊者痛懲之責令倍償其失恭命則重賞之其渠賊吳賴頭賽曹操把地王等以次就擒無良之徒乃恫駭恟恍疑余之日出而網羅之四張也乃大沮散遁於桐梓正安綏陽等處後遇桐梓衛君天民間日子其以鄰國爲壑乎余日子甘爲逋逃藪乎衛未有以應也

治蠱

周禮土訓掌道地圖以詔地事道地隱以辨地物鄭康成曰地

隱若瘴蠱賈公彥曰瘴卽瘴氣蠱卽蠱毒人所爲也是古昔隆時卽有假此以惑人者故設庶氏掌除蠱毒以攻說稽之嘉草攻之先王鴻術經世雅意愛人如此但其所謂嘉草者今不可得而知矣惟神農經云白蘘荷可治蠱明邱瓊山集羣方鈔不知蘘荷爲何物楊用修引急就章注云白蘘荷卽今甘露蓋誤以芭苴爲蘘荷也按古今注蘘荷以臚苴而白臚苴色紫花生根中花未散時可食久置則銷爛不爲實矣葉似薑宜陰翳地種之常依陰而生潘岳閒居賦云蘘荷依陰謂此也夫蠱之於人毒矣中之者嚼豆不腥含礬不苦則腸絞嘔吐救稍遲則僵而金蠶蠱爲最昏夜飛飲水次光如曳彗鮑明遠詩所謂吹蠱痛行暉也又按草木狀吉利草其莖如金釵股形類石斛根類

續黔書卷一

九

芍藥交廣獠俗多畜蠱毒惟此草解之極驗吳黃武中江夏李僕以罪徙合浦始入境遇毒其奴吉利者得是草僕服之遂解吉利卽遁去僕因此濟人遂以爲名此草想卽蘘荷特因人名異稱耳夫九尾之狐谿邊之皮整雌之鱖魚帝臺之五色石游戲之三足鼈皆能已蠱然其物如龍肝鳳髓渺不可得今則磨鉛汁飲之卽立愈無俟問藝法於柳州矣

物類相感志黔南桂州出錫蛇粗如大指

甲有金銀星解蠱毒

假銀

銀有十七種美者有黃銀出蜀中其天生牙狀如亂絲生銀狀如硬錫母砂銀色理赤光黑鉛銀得子母之氣咸真銀也其假者有水銀銀草曾青石綠雄黃雌黃膽礬靈草丹陽銅鐵白錫

諸名皆以藥製成者黔市通用銀名巫絲甚潮低而江西流民巧詐滋甚日造僞者非惟給鄉愚且用以欺官長所謂爲盜不操矛戟者也有得者以視余瑩白精好剪之則鉛實僅面皮爲銀然薄如蟬翼真鬼工也以較慕容超之鐵胎不啻過之按漢孝景時律造僞黃金與私鑄錢者同棄市唐文宗太和三年依中書門下奏以鉛錫錢交易者過十貫以上所在集眾決殺今假銀之罪不下于僞黃金而重于以鉛錫錢交易宜比前代之法置之重典庶可以革奸而返樸也

詛盟

宋遵義軍圖經云民信巫鬼好詛盟嗟乎此不獨遵義也黔之民類然其起於鴟義矯虔之有苗而至今莫之改乎或者曰小

續黔書卷一

十

民有情而不得申有冤而不見理於是不得不懟之於神而鬼神之往來於人間者亦或著其靈爽視聽所接賞罰爲昭蚩蚩之氓其畏王鉞也常不如其畏鬼責而君子猶有取焉者謂可以輔王政之窮也昔蘇公遇暴辛之讒則出三物以詛爾斯屈平遭子蘭之嫉則告五帝以折中命咎繇而聽直何況於里巷之人乎余曰惠吉逆凶福善禍淫經有明訓矣若近日所傳地獄之說感應之書則佛氏因果之旨也聖王御世納民軌物克迪棐常彝倫攸敘閑其衰志敬之遠之莫不灼然於鬼神之故而其鬼亦遂不神是卽所謂神道設教也而豈聽命之云哉

茂學

余攝篆廣順州之日暇則進諸生校論文藝率皆條流紛糅訓

辭樸僊由其采掇陳言罔知晉學也乃倣古人讚學勸學
厲學之文爲茂學篇以訓之 余聞之葛洪曰學者所以清激
性理飾染質素也徐幹曰學者心之白日也王符曰學進於振
而廢於窮顏之推曰不學者遇議論得失蒙然如坐雲霧劉晔
曰人不學則才智腐於心胷由數賢之言味之學烏可已哉今
夫蒸泉之温也不琢之不耀夜豪曹之勁也不淬之不剗犀故
欲超萬里於瞬息必假遺風之堯欲凌巨浪以泳游必泛畫鷁
之觴是以蠶之不繅則素絲蠹矣目之不茶則吳幹壞矣海蚌
不剖則靈珠隱矣崑竹不斷則元音闕矣故曰爲山者基於一
簣之士以成千仞之峭鑿井者起於三寸之坎以就萬重之深
也而顧隼詬無志喆窳無心蠶午於細銳汗顏於羣雅如視肉

之不學乎且所謂學者豈徒泥訓詁摘章句等女史之誦詩
豎之傳令已乎走蟻含卯天胡爲而覆笠斷鼈步亥地胡爲而
息壤日月何以有朏朏山川何以有肺目鬼神何以有形聲制
氏之樂何以僅記其鏗鏘叔孫之禮何以祇通於縣絕非可概
例諸六合之外矣太昊稽象以畫卦燧人因時以鑽火有熊聞
鳳鳴而調律侯剛觀鳥跡而作書是皆大聖人之學乎神明而
發乎物類也不此之循而喬宇鬼瑣之是急勞思慮而不知道
費日用而無成功是瓊甌瑤釜無爨炊之用也鏐弓鈹絃無激
矢之能也故曰不聞咸池之音者不知絲竹之幻眇不覩袞龍
之章者不知毳麇之須捷也夫周公多藝也而朝讀百篇仲尼
履度也而鐵鐻三折墨翟周歷載文盈車仲舒命世目不窺園

倪寬帶經以耜耨路生截蒲以寫編黃霸下宣室以受業甯越窮晷夜以劭功用能究覽道奧窮測微言且曾子七十乃學名聞天下荀卿五十游學卒爲碩士公孫弘四十餘方讀春秋朱雲四十始學易論語皇甫謐二十始授孝經論語終成大儒爲世所仰是以六藝備則卑鄙化爲君子衆譽集則孤陋邈於貴游故曰覩百抱之枝足以知其本之不細也覽汪濊之文足以覺其人之淵邃也鷄之知將旦也鶴之知夜半也運日作日者非之知晏也陰諧之知雨也鵲巢知風之所起獾穴知水之高下也鼈蛇無翼而翔空結羗無鼻而聞香曲蟻無口而揚聲水母無頭目而率魚鰕帝江無面目而識音樂皆物之知也物知之而人不知則蠶珥絲而商弦絕賁星墜而渤海決銅山崩而洛鐘

續黔畧一

應嶢山隄而薄洛竭麒麟鬪而日月蝕鯨魚死而彗星出問之有罕漫者矣其何能識五酉而辨二鶯注紫橐而定裕酒哉昔敬仲矚俞兒曼倩喻畢方廣川識重常中壘曉負貳元遜辨奚囊士深審仲師陸澄明服匿壯武嘆海鳧束皙洞羽觴之委長睿明爭首之器崔躋析羊腸之坂敬宗知顓頊之墟貢父證契丹之駁士秀詳孟婆之神江淹推科斗於周宣斯徵解罇于於干寶束之引影娥於洞冥貽孫實婦跪於渤海鄭欽悟山銘於州里竇儀對乾德於四年以及辨鼯鼠之豹文聆角鯢之人語數白馬之祠祭驗鮫鯉之歸附考商羊之內鼓測神人之玉形何神之有學而已矣人無論智愚倘磨礪以就素業咸足洞性靈之奧區極文章之骨髓矣故曰咎繇雖暗而與辯者同功晉

野雖瞽而與離朱齊明也

續黔書卷一

續黔書卷之二

武威張 澍壽穀著

貴陽熊湛英露階校刊

三閭大夫

玉屏北門外水月菴有祠祀楚屈大夫士人傳其

國初兵燹時見形水裔賊爲辟易故祀之按涉江篇有曰堯舫
船余上沅兮齊吳榜以擊汰又曰朝發枉渚兮夕宿辰陽玉屏
舊隸沅州諒當白者儻徊淑浦淹水容與采芷沅江卽大夫所
謂僻遠何傷也予以壬戌夏雨霽來游刪芟砌草進謁遺像乃
爲文以弔之其詞曰

痛九天之夢夢兮聽皇輿之敗績蓀又不察夫忠謇兮放江潭

續黔書卷二

十四

而疏眇羌不能偪矩逐時兮眾女謠詠以貢色鮀殛死于羽淵
兮雖女嬃猶忌其婞直清白安肯涅淄兮豈靈氛巫咸之能占
時幽昧而捷徑兮董吾道其何嫌漁父旣莫我知兮又孰能與
黨人爲緣瀕于危而不顧兮終沉淪乎汨羅之淵嗟忠直竟溘
亡兮留溢豔之嘉藻何儒臬虧戎高明兮謂揚才以競羣小詎
識風諫之優游兮引靈修於當道睠顧舊鄉以唏噓兮不忍三
戶之煙空竝世旣邁夫椒蘭兮今又何訾乎過忠繫余企仰練
要兮覽遺則焉隕涕悟堯舜之超軼兮以耿介爲天姿何末俗
競昌披兮反離騷而摘詞赤鷄罔測雲鵬兮鳩搶榆而笑之我
弔先生兮哀先生志佩芳棄穢兮導吾先路中道不改此度兮
高雲冠之岌岌行砥矢而言丹青兮嚴界絕夫非義倘世蔽美

而好朋友兮吾將高駝而還寄

附詩

幼愛離騷豔深悲正則忠芳情荃不寤蟬翼策何從壯志
彭咸託讒言鄭袖工翻來女嬃詈誰輔大王雄畫壁天驚雨幽
篁鬼嘯風懷沙遂捐節屬草竟亡功故國東門夢長江糴米筒
失圖在黃棘黃棘地名懷王與昭王盟約於黃棘悲回風篇所謂施黃棘之枉策是也朱子解為黃塵棘刺誤矣
遺恨滿青楓沉芷遠遊地雲冠奇服空魂兮郢都戀歸些巫陽
逢三戶蕪城沒千年典祀豐肅瞻蕉萃像白日鎖琳宮

竹王

昔夜郎女子浣于遯水有三節大竹流過足間中有兒嘯聲剖
視得一男取歸養之及長有才武自立為夜郎侯以竹為姓武
帝元鼎六年平南尼置牂牁郡侯迎降賜以王爵後仍殺之諸

續黔書卷二

十五

尼獠咸以竹王非血氣所生甚重之求為立後太守吳霸以聞
乃封其三子為侯死配食其父此班氏南尼傳之大略也今楊
老黃經驛皆有竹二郎竹三郎祠土人祀之維謹田山薑著論
以為與盤瓠蠶叢杜魄荆尸悉為謬悠蒙竊以為不然夫秘電
繞斗於符寶長虹曳采于華胥簡狄吞玉筐之燕姜嫄履巨人
之跡載在往籍難云誣矣即徐偃破卵於鵠倉朱蒙感精於河
伯蘿林之子紹統檀君朱耶之先載育枯樹著有葑聞皆可証
驗至若毘舍離懷妊生三十二卵卵中各出一兒勇健非凡世
羅優波世羅二比丘從鶴卵生彌伽羅母生三十二子盤遮羅
生五百子皆出之卵又無論也或曰子之說信辨矣水經注云
所捐破竹於埜成林又云王嘗從人止大石上命作羹從者白

無水王以劍擊石石卽出水無乃奇誕弗實乎予曰六合之內其苞遠矣幽致冲妙難本以情萬像遐淵思絕根尋昔夸父擲杖蔚爲鄧林蚩尤棄械叢爲楓樹翠子之經可按已若貳師征敵嶺出飛泉姜詩養親室涌江水精誠所結天怛靈驅又况范文之鯉刀斫鄣廩君之土舟浮流悉是舊聞難比影說知乎此則啓生礪石摯呱空棄事同目習又何疑於竹王之不自竹生哉

或以竹姓出於墨台東莞竹氏後漢樅陽侯竹晏後報怨不改姓加二以存夷齊而遷於莒侍中竺其孫也夜郎竹初宜本此其說亦無據

莊豪

史記云楚威王遣將莊躡從沅水伐夜郎滅之遂至滇池後漢書作楚頃王遣將莊豪二說違異按楚威王于周顯王三十年

續黔書卷二

十六

立至四十年薨在位十年至赧王三十五年秦始取楚巫黔中地中歷顯王之八年慎靚王之五年相距四十八年也如爲威王時事則躡在滇已五十餘年矣何以稽久不歸攷頃襄王之立也在赧王十六年距秦取地十九年躡之奉使至滇值楚道不通當在此時矣至史記作莊躡前漢書仍之後漢書乃作莊豪攷通鑑莊豹注莊姓宋戴莊之族有出於楚者莊躡是也亦作豪郭子章以從豪爲實錄若馬氏謂豪卽躡雲南志謂豪爲躡之裔者無據之說也

馬王

玉屏邑西北有營砦等類相傳爲馬王遺跡馬王俗謂馬援也按五代史楚馬殷梁太祖時拜侍中兼中書令封楚王後平朗

州雷彥恭澧州向環辰州宋鄴淑州昌師益等率谿洞諸蠻皆
附於殷殷請升朗州爲永順軍依唐太宗故事開天冊府置官
屬太祖拜殷天冊上將軍末帝時加殷武安武昌靜江寧遠等
軍節度使洪鄂四面行營都統唐明宗時封殷楚國王殷卒子
希範立襲殷官爵封楚王溪州刺史彭士然率錦今銅仁獎今鎮遠
諸蠻攻澧州希範遣劉勅劉全明等擊之士然大敗走獎州遣
其子師嵩率諸蠻酋降于勅溪州西接牂牁兩林南通桂林象
郡希範乃立銅柱爲表命學士李皋銘之蓋邑在五代時爲溪
洞諸蠻盤踞必楚國所置官屬或馬氏子弟奉王命令號召糾
聚于此安營立砦則所謂馬王乃馬殷希範希廣父子弟兄也
若伏波于漢豈稱王哉

續黔書卷二

七

黑神

按神爲唐將南霽雲范陽籍也黔人以其長冠戟鬚而貌黝稱
之曰黑神其香火無處無之幾與關壯穆等而其威靈響捷也
亦幾與壯穆埒吾想夫尹子奇之復圍睢陽也爲至德二年城
中食盡至掘鼠羅雀延喘堅守陣雲苦深衝梯爭舞公奉張巡
之命犯圍突出告急臨淮賀蘭進明昧捍圍之義腐敵愾之心
坐擁彊兵無援掾意猶復愛公魁岸具饌延留公憤激慷慨痛
生靈之命就枯念主將之精已盡乃嚴責進明以忠臣義士之
爲嚙指淋血射矢浮圖誓掃烽煙還滅賊子志雖未就不可謂
不壯矣死而爲神豈虛也哉顧黔人之祀之者或以其子承嗣
爲清江太守有惠政也而尸祝之又或以其子曾立廟貌也因

相沿而俎豆之然當壬戌苗變貴陽受圍城陷祇炊黍時耳而
旌旗甲馬忽見睥睨賊辟易城獲以全矧夫淫澇愆陽火災
疾疫有所必應黔之人荷賜良多其漚鬱肝蠻奔走而恐後也
固宜

附播州道中謁南將軍廟詩

陰風慘澹歛荒郊訓狐鷓鴣踞

警烏鴉亂飛烏臼樹雲中甲馬翻靈旂老巫開門欸客入中塑
威神紅袍襲黝面長牙倒豎眉猙獰怖人鼻欲歛短碑斜卧霾
煙草苔蘚紛堆待洗掃獸頭鼻鳳已缺殘漫漶似書唐天寶居
民求雨復求晴高香一炷插葑楹神果有靈風雨節種禾種黍
多歡聲合寨斫牛富神意紙錢清酒鵝白翅碎匄銅鼓震遠村
熒女蠻童走如織我亦整衿前稽首敬祝葑途無盤咎彷彿似

續黔書卷二

六

聞神有言林林

山王名呼之却百邪

暗護放心走

北陰神

永樂十二年五溪蠻勾合黑苗復畔阻塞黔楚要路蘄州衛指
揮洪壽隨軍門王鎮大軍五萬分途征勦壽領兵二千五百名
爲先鋒由小洪江進至苗羅苗忽大至時大軍未集壽戰陷重
圍身被七創連衝五次不能出口將晡苗忽驚駭奔潰自相踐
踏死者甚眾壽謂有援兵至及翹望見空中人馬迷漫現五色
旗上有北陰二字似有追逐之聲圍遂解後大軍會於沅江夾
擊壽由五開天柱追至清水河生擒蠻長姚老虎阿泰等百餘
人軍門上其功奉召陛見奏聞神膺封爵而壽授平溪衛指揮
及歸設祭於家忽有巫者踵門告曰奉北陰神命致語汝家吾

本近敦煌一國爲金人所滅上帝憫念無辜封爲北陰神前念爾忠勇危難之中故爾相救巫者且傳其祭享儀制科文陳設及牲牢俱用燔炙大類古時塞外諸國風俗余至屏問諸人言洪姓至今虔祀勿懈云

柴冲大王

深山大壑多有神怪能致雲雨雖非祀典所載苟有益於民卽爲之薦腥俎猶愈於陳寶之祠爰居之祀余至玉屏之五月田苦旱聞城東五里有邃洞洞有神號柴冲大王禱雨輒應卽乾封年亦必少資潤溉邑人士言邇者神爲天柱縣請去祈每不雨余曰旱旣太甚苗將就枯余當請之以蘓吾民也乃宿齋一日豕酒錢帛之屬必具必潔晨步出東門行二里許路無蹊逕

續黔書卷二

九

延緣於膝畔再進則青壁萬尋丹崖百丈逼仄險奇不可以足余手檠辦香鼓氣而上孫甘兩學博王縣尉營弁姚韓二君尙後予半里許也至則刑牲膾血奉爵酌醕盼靈來兮恒幹跪敷衽以噉詞不知神之果鑒否也仍步返署遂往丙溪勘地歸塗次野雞坪忽黑雲蒼鬱凍雨灑塵急策馬返則雷聲電影與盆俱傾洎入闔見闔闐之民憂者以喜病者以愈也越三日乃止優渥霑足歲以有秋非余薄德之所能致信乎神之有靈普淖黔首用能甘霖沛澤不使無鳩也

附憂旱詞

赤日隆隆煎下土遶田龜坼壘尺五嗟我黍禾然焦炷農夫坐視淚如縷肥蠶矯天旱母舞未見望舒離金虎捉來蜥蜴甕底若咒他雲興濃霧吐小兒持枝羣擊鼓願將肥豕祀

田祖涔涔數點甘露乳驕陽猶自披雲覩嗟我農人饑無補何暇綢繆破牖戶安得力牧千鈞弩射殺應龍飛靈雨

李白至夜郎辨

夜郎漢屬牂牁郡牂牁本且蘭國在今播州界唐屬珍州在今歌羅寨李白曾貶竄於此今桐梓驛西二十里有夜郎城道卧古碑字已漫滅縣治内白故宅舊井跡存焉余攝篆播州之日暇游桃源洞洞前巖巖屹然鐫曰李白聽鶯處蓋清浮蟻酒醅初緣暖入鶯簧舌漸調乃流謫時所詠也近人謂白流夜郎實未至其地據贈江夏韋太守良宰詩云五色雲間誰飛鳴天上來傳聞赦書至却放夜郎回又據詩云昔去三湘遠今來萬死餘謂白泝三湘將上夜郎即聞赦命而還其說疏妄之甚夫白

續黔書卷二

下

之在夜郎也蓋久而後奉金雞矣其秋浦桃花憶舊游詩所云三載夜郎還于茲鍊金骨也又烏江留別宗十六璟詩曰拙妻莫邪劍反比二龍隨蓋白攜妻子就貶所而宗璟從至夜郎仍旋鄉里白送之於烏江也烏江在今遵義城南八十里源出黔西經縣之湘洪仁三江由思南北流入蜀之涪江與詩所謂白帝晚猿斷黃牛過客遲者亦符又不止題葵葉贈辛判官聞醜不與諸詩之可徵也今不觀前賢全集輒聽一二語以爲譚資且矜爲創獲是猶詫維摩之取孟堅而遺班固也

懷白亭

遵義城外里許有桃源洞洞有懷白亭明大學士王應熊之所建也其曰懷者不知與吾意之所懷異亦不知其與吾意之所

懷同但以千百世之下尙有人焉慨慕而懷之則白之自有可懷者在也余嘗讀贈江夏韋太守良宰之詩矣憤九土之橫潰念二聖之游豫蒿蒼生之無辜斥公卿如犬羊非徒作豪語以自快蓋其窮理亂情涉霸王略故有此箭落旄頭弧墮天狼之壯志迨至爲負霜草蒼昊莫訴乃思栖蓬瀛學丹砂雖有冥鴻高飛不爲弋人所篡之意而慶幸於日之再中辰之居正是仍抱大國之憂灑沾纓之淚也而人之懷之者輒以其詩恩之不羣抑末矣余是以爲之論曰

昔青蓮以龍蟠勅逸之士眼識汾陽氣吞力士其稔期可蓋世矣洎其乘醉應詔倉卒對御以至尊寵况彼飛燕居然納牖隙誨之義不獨詩詞可被管絃已也使元宗識其俊杰寘彼周行

續黔書卷二

三

用能嘉謨入告正色立朝必不肯倚楊氏之山象林甫之手以辜主知且可令徽嬪之徒惴心恣志卽不然試于疆場授之戎麾其時薊門烽火鞞鼓震天白也夙習劍術訓練士卒亦足以捍圍敵愾摧漁陽之烽何至大河以北無堅城二十四郡無義士而洛流嗚咽河潼染腥天下事等諸車犇船沈乎卽使霓裳舞破玉壘難回而身膏塗草亦當與杲卿之舌睢陽之血同其激烈共享榮名乃卒蹇偃不振飛黃伏皂空名自悞竄身蠻荒其才未竟其志未申徒令後之人以騷人墨客相稱許悲夫

謁王陽明先生祠記

澍嘗誦先生何陋軒記之言矣曰愛憎面背變亂白黜浚奸窮黠外良而中螫諸夏蓋不免焉雖彬郁其容宋甫魯掖折旋矩

獲猶之陋也夸之人迺不能此其好言惡言直情率遂則有矣
世徒以文詞物采之渺而陋之殊不然也嗟夫先生之論不獨
洞物情直示人以樸令各返其渾穆之天而狡匿譎詐之不作
庶典章禮樂宮室軒裳可附之以行不然是無軌輓之車也又
以夸之崇巫事鬼瀆禮任情不中不節期望於來者之移風易
俗是直以天下無不可化之人以夸之昭質未虧因其機而利
導之則爲功易而爲效亦速何今數百年間人心不古風氣日
漓變更若此其甚豈降衷之不恒乎夫固有以教之也誠使爲
司牧者倣古歛射讀灋而教之以父子兄弟夫婦朋友之經以
戰其椎魯囂悍睚眦之習俾各安於刀耕火耨無飢渴死傷之
嗟因示之以典章禮樂宮室軒裳之樂漸改其椎巖卉服鳩音
獸息之傲夸雖蚩蚩吾知其從之也如冬日之陽夏日之陰不
召而赴也乃有司者競爲貪黷敗檢亡節且以夸之蚩蚩也而
誅求之過甚夸之人以爲是不足父母我也規避之心浸假而
爲侮慢侮慢之心浸假而爲狡詐並其本然樸塞之陋而亦失
之是士大夫無廉恥而望天下有風俗不可得已今者顧瞻廟
貌道範斯在念先生尙不敢任化理之責余小子痛俗之不競
教化闕如用是奮用是懇矣

十八先生墓

當明之季永明王由榔自廣西走貴州孫可望處之安籠所新
興義府無人臣禮從臣與內侍等咸憤甚飲泣計與李定國共圖
可望謀泄可望遣人拷訊十八人同聲不屈死時人哀之收遺

骸葬焉表之曰十八先生墓今興義府城南纍纍者是也從臣則吳貞毓張鐫周允吉楊忠徐極蔣乾昌李元開李頎朱議屨鄭允元趙賡禹蔡續易士佳胡士瑞朱東且任斗墟也內侍則張福祿全爲國也

按明史有給事中林青陽御史林鍾無楊忠李頎二人

論曰國運值陽九之會爲臣者質首糜軀無有攜貳詎不稱義烈哉又或潛孤偕亡撥亂圖存吹灰於已寒張律於旣絕亦可謂亮亮苦節矣然吾觀周之宣以奔奔之難獲衛于召公而姬籙復昌漢之宣以巫蠱之難獲養於丙吉而卯金再振獨惜當日諸臣之未養晦也然天旣厭德人斯云亡諸臣者素未享厚祿握重權而胼胝戈甲寤寐風霜能以死報其主數百年之間豺虎已化攢墳刺天傷心人望古遙集能不爲之銷神壤末追

續黔書卷二

三

魄天濤乎

盤瓠

狄狎狎獬豸等種皆祀盤瓠相傳卽盤瓠後余謂此本依附之誕說而人信之篤則亦未攷其原也化益山海經云卞明一作弄生白犬是爲蠻人之祖卞明黃帝之曾孫也而應劭遂謂高辛氏之犬名曰盤瓠妻帝之女生六男六女自相夫婦是爲南蠻抑妄矣夫白犬者殆猶後世豹奴虎狔狗兒犬子之稱耳豈真殷虞晉葵宋狔韓鵠哉今木瓜金筑之間往往壯厥棟宇貌一犬而胖蠻焉是猶掀伍子胥之髯而續西門豹之尾也亦大可哂已

紫姑

劉敬叔異苑云紫姑本人家妾爲大婦所逐正月十五日感激而死故世人作其形於廁以迎之卜云子胥不在曹夫已行小姑可出子胥婿也曹夫姑也又荆楚歲時記云望日之夜迎紫姑以卜今黔之各郡不聞有此俗獨玉屏於元宵小兒女用帕巾蒙簪簪以花朵兩手托之間眾事蓋猶是楚之遺風也

續黔書卷之三

武威張 澍壽穀著

費陽熊湛英露階校刊

黔中

黔中之置郡也當秦昭王之二十七年爲周赧王之三十五年取楚之巫黔中地而置也漢高帝四年改黔中地爲武陵郡始元二年分天下爲十三部武陵郡屬荊州部後漢時武陵郡屬蜀昭烈沒復屬吳晉平吳州郡雖屢有更易而武陵常屬荊州劉宋時武陵領於郢州刺史隋開皇初廢武陵爲朗州大業初復置唐武德四年置黔州貞觀元年復以黔州之都上縣開南戶置戶州九年以隋牂牁郡之牂牁縣置播州十一年罷黔州

續黔書卷三

三五

都督府置莊州都督府先天元年廢播州都督府復置於黔州開元二十一年分天下爲十五道設黔中道置黔中採訪使治黔州大曆五年改巫州曰叙州改業州曰獎州元和二年廢珍州入濠州思戶費播濠錦叙獎八州皆隸黔中採訪使宋初因之止存彭水黔江二縣省洪杜洋水信甯都濡入於彭水是則秦之黔中卽漢之武陵兼今湖南常辰沅寶靖諸府並包今貴州思石銅黎思南諸府也唐之黔中亦兼今黎平鎮遠遵義思南銅仁之地也若宋之黔中並及四川重慶彭水諸縣也世徒以貴州爲黔中殆拘墟之見矣

夜郎

西南戶君長以十數獨夜郎爲大楚頃襄王遣將莊豪伐之軍

至且蘭椽船於岸步戰滅之豪遂留王滇旋夜郎仍自立爲侯
漢武建元六年遣唐蒙通夜郎元鼎六年平且蘭遂平南且侯
迎降錫以王爵後仍殺之置牂牁郡後置益州以牂牁屬焉晉
永嘉二年分牂牁立夜郎郡領夜郎四縣宋齊隋因之唐武德
四年析且州之甯且縣置夜郎縣貞觀八年析巫州之龍標縣
置夜郎十六年開山洞置珍州亦置夜郎天授二年又析夜郎
置渭溪縣長安四年以龍標所析之夜郎渭溪二縣置舞州是
今石阡思南爲且州之夜郎也今黎平鎮遠爲龍標之夜郎也
今桐梓正安爲珍州之夜郎也若秦漢時之夜郎則西距邛笮
東接交趾地凡數千里今人徒知遵義之爲夜郎亦不知夜郎
之大矣

續黔書卷三

龍標

黎平秦爲黔中郡地漢爲武陵郡地至梁於漢巫縣置龍標縣
隋屬沅陵郡唐武德七年置龍標縣貞觀八年置巫州析龍標
置夜郎郡渭溪思微三縣天授二年改巫州曰沅州析夜郎置渭
溪縣長安四年分沅州之夜郎渭溪置舞州舞州即今鎮遠是
沅州即巫州巫州即龍標縣在沅州之上鎮遠之下境壤相錯
即龍標縣地也又按開元十三年復改沅州爲巫州大曆五年
改巫州爲叙州叙州即今黎平亦即龍標縣地也玉屏舊屬沅
州其爲龍標縣地無疑

按王昌齡貶所爲今黎平之龍標非沅州之龍標也

廢牂牁郡

漢元鼎六年平且蘭遂平南夷置牂牁郡後置益州以牂牁屬

焉始元二年分天下爲十三部武陵屬荊州部牂牁屬益州部
後漢州郡因之晉永嘉二年分牂牁立平夸夜郎二郡劉宋時
牂牁平夸夜郎屬甯州隋開皇初置牂牁郡廢武陵爲朗州大
業初復置唐武德三年以牂牁首領謝龍羽地置牂州貞觀元
年以隋之牂牁縣置朗州並析置恭水高山貢山邪施柯盈釋
燕六縣九年以隋牂牁郡之牂牁縣置播州按今平越所轄數
處卽故郡地也牂牁字形各書不同前漢作牂牁後漢作牂牁
常據華陽國志亦作牂牁隋志作牂牁郭忠恕作戕戕韻書作
牂柯或作椿柯然史記西南巵傳及宋晉志俱作牂柯自當以
牂柯爲是若楊用修作戕戕猶之以惡獸白澤入石鼓正文惑
之甚者也

牂柯江

續黔書卷三

七

牂柯江者楚莊豪伐夜郎楸船處也漢初卽於是地置牂牁郡
特以地屆荒服桑欽酈道元輩未嘗一問津宜其於江流原委
略而不詳後之人或以烏蒙七星關水當之或以烏撒之盤江
當之或以定番之濛潭當之而總未覈也夫七星關之水固東
出烏江不注可渡河矣可渡源發金沙江來自吐番由雲南之
麗江塔城關入中國經鶴慶姚安東川武定諸府至四川之叙
州與岷江合入於東海非若盤江之從粵入南海也且盤江兩
山夾峙波濤湍盪蛟龍魚鼈之所不窟而謂可操舟耶若定番
之濛潭雖注泗城州而入粵而不能入番禺且涓滴流也亦與
史記所記廣數里者不符吾聞唐蒙之風諭南越也蓋嘗踪跡

之以爲夜郎臨牂柯江矣武帝遂拜爲中郎將從巴蜀徼關入
因見夜郎侯多同聽蒙約束還報以爲犍爲郡發巴蜀卒治道
從犍道指牂柯江今播州夜郎地也犍道又與播近則牂柯江
卽烏江無疑余弭節遵義至城北九十里有蒙渡橋爲黔蜀要
路父老傳其卽蒙發卒治道處云

羅甸

蜀漢諸葛亮南征蠻長濟濟火佐擒孟獲有功封羅甸國王此
羅甸立國之始也唐元和六年羅羅鬼王上表請盡歸牂柯故
地開成元年鬼王阿佩內附會昌中封其別帥爲羅甸國王世
襲爵宋開寶中普貢納土襲封如故元至元十五年羅氏鬼國
主阿榨內附詔授安撫司十七年復叛左丞李德輝諭降其酋

續黔書卷三

三

長阿察奏鬼國爲順元路以阿察爲安撫司至阿畫以軍功授
昭勇大將軍佩三珠虎符爲順元等處宣慰使加羅甸侯世居
水西有爵土靄翠卽其子也後爲安氏明洪武四年靄翠歸附
授貴州宣慰使翠死都指揮馬欲盡滅諸羅爲郡縣翠妻奢香
奔訴太祖願効命遂率諸羅開偏橋東水道以通烏蒙烏撒及
容山草堂諸境且立龍場九驛以通巴蜀而西南益闢卽濟火
之裔也入 國朝安坤構亂討平之以水西爲黔西府今改比
喇爲平遠府今改大方爲大定府烏撒爲威甯府今改蓋自濟
火至安坤歷千四百餘年而亡云

附明楊慎羅甸曲

山圍羅甸國水繞滴澄橋橋下東流水可惜

無蘭橈一蠻樹不凋葉蠻雲不放晴長亭望不見何處是查城

二塞鐙闕孤館陰雲鎖重城長夜恒思曉久雨恒思晴三林間
山胡鳥聲聲嘒我前何似故園裏花亭聞杜鵑四

八番

八番者大龍番小龍番卧龍番洪番程番石番盧番韋番也五代時楚王馬殷遣八姓帥率邕管柳州兵討兩江溪洞至此留軍戍之遂各分據其地號八番宋初以來有龍番方番張番石番羅番號五姓番世奉職貢受爵命龍氏於諸番最大其貢奉尤頻數元符二年又有牟韋番入貢詔以進奉人韋公憂公利等爲郎將諸番部族數十獨五姓最著程氏韋氏皆比附五姓又號西南七番元至元十六年設順元路宣慰司隸潭州行省遣兩淮招討使經歷劉繼昌招降八番俱授爲安撫司至宋迄

續黔書卷三

五

元龍番分爲三而張番之裔無聞明設程番府後移府於布政司治城萬曆十四年設州領長官司十七國朝康熙五十年革盧山司五十七年革大華司雍正七年革洪番司今設者程番司韋番司盧番司卧龍番司大龍番司小龍番司金石番司上馬橋司小程番司麻嚮司方番司木瓜正司木瓜副司凡十四也

銅仁

郡之西南隅有銅巖當兩水合流處省志言昔有漁人沒江底得三銅人挽而出之郡以此得名又載播州銅佛寺有七銅佛一夜皆失思南漁者得其四建金仙寺奉之銅仁得其三想卽以江中之所得者爲播州之所失也然銅之得在元時播之失

則明嘉靖十四年歲月不符且江之得者三播之失於此者亦
三仁者二人也何錫名又不實乎蓋郡舊爲錦州元始置銅人
大小江等處其曰銅仁者則明洪武初改之之誤也或乃以播
州之失者牽合之何其謬與

句漏令

今永豐州之羅斛東六十里有洞在山巔寬敞幽僻人跡罕到
相傳葛洪煉丹於此余按葛洪本傳洪求爲句漏令欲餌砂駐
景至韶州爲鄧嶽所留不得往乃止羅浮山修鍊是稚川未嘗
至句漏也何爲有藥竈之遺夫臨賀之石雷公磨刀涇州之堆
夸父振履軒轅鑄鼎于鼎湖委波皆是重華播琴于厯畔顏阜
都名大抵皆妄者所傳也

續黔書卷之四

武威張 澍壽穀著

貴陽熊湛英露階校刊

萬卷書巖

水經注云河北有層山山甚靈秀縣最多石室室中有積卷而世士罕有津逮者謂之積書巖巖堂之內時有神人往還荊州記云小西山石穴中有書千卷相傳秦人於此學留之故梁湘東王云訪西陽之逸典也余載念前言每思御飊輪而上尋瑯嬛福地培守門之犬讀王京紫微金真七映丹書紫字諸秘籍而遇嗇緣慳未之或覩又念乏子雲之好奇慚安世之善記卽有玉版奇文瑤壇怪牒亦嘗視茫然矣夫羽陵蠶簡汲冢竹書

續黔書卷四

三

羣玉爲先王之策府宛委有治水之元經是名山者固儲書之石室貯典之蓬觀矣玉屏邑東一里縣巖峭壁疊石千層儼若牙籤萬軸橫亘江左則萬卷書巖也余旣不得讀中秘書而來此何敢薄民社爲粗官但一行作吏此事遂廢每當敲朴犯慮牒訴裝懷之時登臨舒嘯坐擁萬卷不啻南面百城而塵容俗狀俱爲之一洗是亦謫宦之至樂也

附詩

祖龍劫火不到處長恩潛在深山語怪牒靈文媿皇墳不計渾沌何年貯天以層石作金題犇雷不掣勞黠鼠犛苗詎識靈寶方徒墜蠻荒誰企佇壬戌之夏我游暑一笑此中字堪煮擬將濶斧倩巨靈鑿破幽巖之岨崕龍威僵走赤雀飛露出尊盧古時楮水湔青鐵磨踰麋寫遍雲膜字如黍語奇文奇驚鬼

神借人可得束脩荈孰知造化妬我心鋸斤未試風雷阻潛潭
巴兮竟緘封濤聲日夜護江渚

游紫氣山記

昔柳州之游記山也曰奧曰曠竊謂此兩言者不獨刻山之
兼得山之理焉黔固山國也而玉屏之西境逾黎平與粵爲
鄰連峯複嶺彌望不絕然或則頽府無丈之材或則單椒無曲
之巒求所謂奧如曠如者不可多得今夏伏口焦暑衙齋湫濕
赫曦逼人王尉露謂城西隅紫氣山雅宜游暑遂觸熱往未半
里則見陂陀回互岡巒起伏竹柏蔭於層石雜花叢於巖側微
颺暫拂煩衿頓滌實仙靈之館也爾其清谿環流潤氣上浮荇
藻漾潔游魚乘空樹入牀前橫籐礙路山來鏡裏鳴鳥依人予

續黔書卷四

三

亦不自知其何以目不周翫情不給賞也嗟夫元圃銅柱君山
玉臺姑射尋山崆峒訪道誠栖霞之逸志或齒屐之寓言孰若
此山境鄰城市不染囂氛楹不待鑿曦自隱曜田鋤芝而鳥耨
泉挂鶴而煙霏哉假令子厚來此必悔其以嘉名錫彼穢區也

游東山記

出玉屏東門循山麓而行石磴盤曲路才容軌方里許延緣於
田畔時新雨初霽畦水漲汎秧苗抽鍼平綠如芻穀犬亂吠殊
足喜人再進則一徑雲深層松攢柏列若夾道叢柯隱景交蔭
修篁清籟鳴條山壑俱響雅可游目憑衿悟衷散賞山之右爲
寺正殿倚巖結構雖未宏麗而真容巨壯亦稱雄刹兩廂有樓
可眺遠下則遊人憩息之所旁穿小徑蒔藝雜花有洋綉毬二

株爛如雲錦薄午鬱蒸予倦甚沉睡多時起呼饋則夕陽已銜
山矣出山門振袞延風神志爲豁牛下遠邨炊煙在樹歸飛之
鳥干翼競來俯瞰大江洄瀾如帶視往來征帆不啻鳧雁也

重游東山記

今夏三月杪余曾策杖來游茲以巡稼之隙復問塗焉時金風
初扇而餘暑猶熾人乃於林際跌坐散髮跣足松濤竹響清若
芋筮舉頭一笑煩衿頓消俄王尉聞予游亦來相與踞盤陀翫
霍靡聽鳴禽之上下俯視遠水空明皓同積雪仰瞻白雲翹然
天外舒卷自如而蓮峰北聳疊椒重窳刻露清秀恍覺舊游無
幾而風景頓殊猶然塵鞅儼山靈騰笑我也乃朗唸曰青林倦
鳥語綿蠻似說白雲返故山日月幾何風景換鏡中疑我尙朱

續警卷四

三

顏蓋予是時有退志矣遂循莎徑至寺後見攢木疎頰圍繞沈
池澄渟鏡澈浮萍含綠微颿乍拂漪漣生文蓄金魚二三百尾
曦景斜注則相聚响風稗爲戲又或衝藻徑去游閑遠放若避
世士然低徊者久之乃與王尉聯騎歸回視嶮嶮如攢圖之託
霄上矣

飛鳳山

昔向長欲男女婚嫁畢裹糧游五岳是身勝賞神鄉秀情超拔
矣余疇昔亦心栖白雲邈想遐踪今遠宦來黔始入界所遇巖
巒殊無慰羈望者舊說天下山半在黔中青疑昔人譌詞也洎
抵任視事稍暇凡境內山川亦每觸岫延賞傾澗懷烟而人士
多嘖嘖飛鳳山之奇其言曰山之高森峰礙日峭壁爭霞梵響

凌虛遠山相畚下則埜雞河清流見底河濼如帶架木爲略約
通之蘭茝被徑幽香馥郁榜曰眾香國高僧某卓錫時之所顏
也玉皇閣倚雲結構渺如仙居轉側十餘武丹崖翠嶂有同點
黛石罅中瀑布激素飛清如委幅練數折入河聲猶雷轉循崖
東而左仄徑難登猿亦須翼攀蘿附葛乃躋絕巔其上眞花不
落古樹恒春岫挂藤苗岑懸竹影自下望之淡泊如笑蒼翠如
滴明淨如粧慘淡如睡四時之景豁目散懷予耳之神思飛越
覺天台匡廬恍遇目前急欲往游以盪吾胸會差至不果輒形
夢寐後勘地丙溪途次埜雞坪去山里許見層巒疊嶂中一峰
高聳旁有兩山夾拱如鳳舒翼憬此山之得名不誣也爾時白
雲罨靄細雨廉纖路泥淖甚又不得往游以探勝恍如海上神

續警卷四

三

山可望而不可卽然予有濟勝具俟秋高氣涼餘暑稍退終當
凌最高峰造幽峻看博芙蓉之石調鶴柜格之松聆風泉之虛
韻翫巖桂之清香不使子平獨精物隱也聊記此言以爲券

游白雲山記

廣順州東四十里有白雲山層巒疊嶂如渴驥奔泉至此而止
白雲龕峰頂陰晴皆見爲建文帝荒遯之所上有羅永莽莽前
古杉三株長數丈其一經帝手摩至梢無附枝又有跪井舊無
水龍神爲之湧波恒雨不溢恒暘不涸時有雙鯉出沒其間取
水者必跪汲乃可得云余於癸亥之二月攝篆斯州暇日命駕
往遊欲向寒煙蔓草問卓錫之遺踪至則鹿苑積廬泉流息脈
林雅空噪巖磬無聲惟嶺上白雲尙依依似舊也道旁卧一石

禍鐘帝詩三首係州牧韓之屏重刻者其中牢落西南一詩作於滇南後二詩作於羅永者彙刻於此則韓公之疎也余既別蘇讀之遂策馬歸歸途少轉有蒼嶺橫亘挾雲欲飛懸崖青石如婦人回首顧盼簪髻宛肖相傳有神嫗每夜至帝所服役後被人覩歘化爲石又有沈潭澍滉澱沈碧無波相傳帝昔經此忽一靈犀躍出跪伏道左若聽驅策者噫鳥翼庚辰虎乳鬪斑金狄洒淚泥馬騰波蛇衛顛頊之墓燕銜臨江之兆神獻管涔之劍龍春寄奴之藥往籍所載非同虛妄矣既作此記復繫之以詩

何年脂帝構曾駐壽星蹤鐵匣歸天數金川遯賊鋒驚心黃屋杳滿目白雲封草木挺旌節袈裟換袞龍虬供石洞米鹿聆闍

續黔書卷四

三五

黎鐘受詔屏分水服勞嫗化峰經途無白鳥

一宿河至今無直蚊帝曾宿此

幹有青松江海團瓢寄關山程濟從鵲啼篁竹裂鶴唳瘴烟濃我到尋遺跡悲填萬古胸

附建文帝君臣論

余嘗讀史至金川門失守而王鉞言高皇帝有遺誠

既得鐵函鎖柙度牒剃刀竊嘆厲孤糞煎妖讖亡姬銅駝水萍天心割漢似有定數不可以人力爭又念惠王居櫟仍殺子頽襄王居鄭終誅太叔五年而天節反一旅而中興奏則忍辱圖存乘機觀變未始非識時之俊杰撥亂之雄才方其成皇死沙場昭帝居梁闇俺答鳴鏑戈鋌鈍於邊關高煦磨牙蜂蠆伏於肘腋國勢孤注人情狐疑必不能長駕遠馭皋牢萬里之外而滇黔地險沐氏兵強假令劾申胥頓庭威公泣血自能發勇氣

於仲禮唱義聲於濟陽濮軍出荆門卽襄鄧可搖戈船下漢南
卽長江可據奮青邱之神劍返紫宮於彝庚仁壽之鏡重明雲
臺之仗復設握符闡珍當不其難奈何嘍痕浸淫於枕席皇屋
寄寓於團瓢不知晉鄭之依疇爲共和之計黃圖赤縣置之罔
論毋亦諒精衛不能塞海愚公不能移山遂甘心於瘴雨蠻烟
罔筮夫貞風熾火真所謂亡國之大夫不足與言事乎誦楞嚴
而白髮蕭蕭敲梵磬而天門蕩蕩忘其有聖人之寶轉依於法
王之輪毋亦險阻備嘗精力銷亡魂將斷於祖龍方思山鬼銜
璧運已去於佛狸又恐帝死實鹽戀此骨骸因思歸葬西山乎
至若痛哭之五十餘人從亡之二十二士沐雨櫛風胼手胝足
四十餘年忘其勞動寃霜可以夏零憤泉可以秋沸雖無仁傑
殿下而主臣者豈可同年語哉

梵淨山

黔之郡凡十三而山接蠶叢江通雲夢扼百蠻之要害者以銅

仁爲最銅仁之山凡數十而巖谷幽異峰巒峭別壯三江

江銅仁江之形勢者以梵淨山爲最玉屏與銅密邇余恨局於墨綬

不得往一問辟支佛之遺蹤然數數輒聞其奇默想其景髮髯

其境界不啻目寓之也聞絕巔有寺風峭不可瓦治以鐵疑蜚

廉爲之歛炭屏翳爲之鼓爐也寺側有崇臺三日拜佛日說法

曰煉丹疑鴻衣羽裳練精餌食之夫所宅也有井曰定心水

沁肌骨清鑒毛髮疑飲之者可洗躁進之懷也山後有池曰九龍池皎焉冲照淨無斥草疑有翠鳥銜其淪瘳也登之者先由金刀峽而上峽之高千仞中如斧劃隔五六尺許有飛橋相接疑巨靈之所開鑿也左右皆立梵宇廣濶可容數十人陟者攀絙上下若蹈空而行疑上落雁峯千尺之幢也至其椒千里風煙可一覽而盡疑登岱宗日觀可小天下也然周圍僅四丈突兀陡絕疑猿徒喪其捷巧鼯族謝其輕工也又有香爐峰綿絮宮藏經宮羅列競秀下有九十九溪紆折環繞疑匡廬武戶之勝天台雁蕩之奇亡以逾也余於黔之錦巖珠壑秘洞靈淵亦幾遍踏矣疑此山不獨銅仁之壯觀且爲全黔之勝槩也

飛雲巖

續黔書卷四

天官家言周雲如輪魯雲如馬秦雲如行人齊雲如絳衣宋雲如車趙雲如牛楚雲如犬韓雲如布魏雲如鼠越雲如龍蜀雲如困而不聞黔之雲爲何狀余來黔見毒菁灌莽嵐濕之所蒸鬱爲蠻雲類符陽之怪氣無所謂花葩紕縵錦繡縹緲懸華曜藻慶裔網緼者乃至黃平游月潭寺顧瞻巖石則爽然失愕然驚且憲憲然目不周覽也則見奇勢紛詭不可名狀或曩扇而彭薄或輪困而屈鬣或攫拏而蒼鬱或逆豎而倒懸或龍蟠而虎戰或鵬奮而鳳軒或蛟騰而鴻逸或獅厲而象狂或轟引而旗導或纓綴而帶翩或乳垂而烟結或浪湧而濤漩而且高者礙日下者回嵐巨者包谷空者隱潭皺者膚蹙漏者竅含瘦者骨削薄者殺多墜者星落簇者毛甍立者如昧欹者如嬉蹲者

如怒斷者如虧竊嘆曰此巖之石何其譎也何其似雲之欲飛去也雖然造化之工之奇能以黔之荒僻而闢此靈巖復能使磊磊之石變態而不可究詰卒不能使雲之東西絡繹南北油裔者如此巖石殆此巖已罄造化之巧彼蒼無復餘情以付豐隆故此巖遂得獨擅飛雲之奇也夫

黔靈山

古城李孝廉芬疎曠士也余引疾閒居日借游雪厓洞因爲余譚黔靈山之勝約共往游旋孝廉返鄉去不果時屆初秋天高日晶萬象森露遂乘興步出陸廣門石逕紆曲寒谿汨瑟遠樹空碧哀蟬激響恍助予之鄉思約行三里眾山回抱中露出羊腸一綫盤旋直上若鳥翀霄天風振袂足履波濤仰眎蔚藍天

續黔書卷四

三

蒼蒼如石壁洎造巔則豁然開朗雄濶廣敞若未始有山者修篁萬个蒼翳成林曦暉側注金影瑣碎延佇凝睇青甯蟬動綠痕上衣裾苾芻出邀入淨室茶飲少憇由正殿側右至一院見鹿子二往來意甚適廣庭間則游人匡坐之所也壁多題時官詩獨鄂西林相國近體二章契予心據石和之擲筆舍去抵寺後見攢木千章圍繞如幄長卿緣坡而舒翠蔭子附枝而凝紅蒲鋤振羽於草根媚虬引嘯於林杪扶老之禽與梵音相會石竇之水共松濤偕鳴余亦乍覺其秋色之上眉也徘徊者久之日已入蒼林埜烟漠漠微辨來時路望見明月宛宛如故人偕游者予弟淑也

附追和鄂文端公詩

烏紗新脫却擲杖問仙靈袖攬嶺雲白眼

爭山骨錫鐘林表度馴鹿苑前經寺僧養鹿子二默念銅文頌商飗

入廣庭一泓鳴玉筑萬綠聳金莖似此山如買當為智者營

聽濤松栢格喝月影顏傾俛仰九霄濶軒渠鵝籠生

附元詩

弓衣馳小隊紆逕入黔靈隔岸竹林紫舉頭天骨青芻

尼馴上座焚貝理殘經問訊峨眉老獼獠認祖庭主僧西川人主曹溪派

刹那車三瓦莊嚴草一莖眾人殊狗苟吾道亦蠅營活法渠

會泥沙迥自傾底緣返初服安養證無生

游牟珠洞記

牟珠洞在貴定縣西十餘里洞內有羅漢大士石像皆天生自然妙麗莊嚴石笋一株竦削鮮潤青如瑤蓼余壬戌至黔往來且蘭數過其處乃呼道士燃炬深入則見石乳結撰嵌空玲瓏

續黔書卷四

幽邃嶽寄入開靈境雲譎波詭莫可名狀有若象者蹠足而躩

踞有若龍者攫爪而蝨螻有若虎者摩牙而趨趨有若豹者談

舌而捫掇或者若羊眠者若牛逸者若馬藉草而伏者若禺彊

負巖而犇者若麋鹿又有十丈蓮花亭亭扶疎翠色欲滴如仙

掌之金莖也藕船類屋橫亘天漢波濤齋淼如博望之星查也

石梁聳峙如彩虹跨卧上有僊官鶴髦羽衣童子持幢前導也

又有樓觀宮闕結構窳窳如入建章之宮而千門萬戶也如造

閩風之巔而銅柱瑤棟也如游蓬萊方壺圓嶠三山而羽人出

沒其間也有石鐘焉蒲牢生動蠡文齧缺扣之如木勝周景王

之無射也有石鼓焉擊之則軒乎鬻乎如奏鈞天廣樂其聲動

心無需蜀郡之桐魚也道士撥火指地上曰此梅花也眎之瓣

蕊鮮妍皎瑩如玉疑天女之所散釋迦之所拈也忽有聲自中來泠泠然似琴戛戛然似筑琮琤然似敲玉嫋嫋然似彈絲復杳杳然似湘靈之鼓瑟嬴女之歛簫也頃之砰然如雷霆轟山劃然如巨靈劈岳渚然如康回觸不周其澎湃振盪如天風海濤然其凌厲呼號軒天蹠地如昆陽之戰猛獸助怒屋瓦皆飛然余方睜眙驚詫莫知其所由然道士則曳余裾出洞指澗間曰向之聲不一聲者水哉水哉余曰然乃記之

鮎魚洞

洞在玉屏大江右石壁百丈中凹一洞碧水沈涵產鮎魚焉或曰洞中一石垂爲鮎形故名也按說文鮎鯢也爾疋釋魚注別名鯢江東呼爲鯢昔陳蔡之厄作崇以與季路搏者卽此物也

續黔書卷四

四

夫鮎之爲言黏滑也鯢魚似之鯢兩目上陳方頭腹重墜若囊身微紫色無鱗一名人魚其膏燃之不消耗秦始皇常以其膏爲燭又似鮓鮓偃額大首長尾四足一名孩兒魚生谿間能上樹含水葉覆身鳥來飲水輒取之知鯢鮓之狀鮎形如繪毛傳說文以鮎爲鮎以鯢爲鮎殊闇於訓稽矣周益公記宜興洞有四足鮎宋乾道六年行都北關有鮎魚色黑腹下出人手於兩旁各具五指則鮎妖也玉屏城西二十五里又有鮎魚洞產鮎肥美

諸葛洞

偏橋北五十里許有諸葛洞武侯征南蠻經歷處也洞中有怪物狀如水兕往時曾出爲崇地勢緊湊青崖翠發望同點黛上

下距懸五六丈巨石臨危若墜復倚濤涌波襄雷奔電洩渾浩
鬩怒鼓若山騰濬浪頽疊迄於下口雖呂梁龍門之險亡以逾
也舟至此遂止冬月水勢稍緩多人捧曳可至偏橋其上雜樹
交蔭罕見曦景瀑布垂巖若斐幅練湍激之音奇爲壯猛曉禽
暮獸哀鳴相和亦饒堊花丹葩綴谷若紅雲秀天蕤熒飾崑若
銀燭眩目觀者思難周賞情乏圖狀矣壬戌四月余自貴筑返
屏禺中至施秉汎舟經此因泔贛水漲白波如山爾日又值大
雨鴻流尾輪環濤輟轉桀石橫亘江中礪礪似屋一葉輕舟時
時觸之堯駛御颯軒天蹠地恍天吳爲之咄歎馮夷爲之颯躡
也然延矚奇景魄爲之駭後爲友人言之輒咋舌去乃記之以
詩

續黔書卷四

四

嘉慶之七年四月日辛卯張子返平溪卓午偏橋道歸心晨風
迅買舟泛浩漭墨雲忽滂灑傾盆雨洗燥揚帆泝石瀨擊汰度
雲堡忽驚前路斷破碎眾山倒嶢整相枕拄抨擊肆排弁雷霆
抉地軸冰雪耀暝昊自省而肉身何由逐飛鳥麤陳所見狀覩
縷恐難了矗若懸壁豎仄似幽術窈雄疑虎豹蹲奮想鷓鴣矯
圓者困廩堆銳者刀槍慄俛者兕飲澗跋者馬騰阜其品備甲
乙其色雜青縹類顛杷面醜巖嶮檜情狡離離斷又續沓沓負
還抱上有招魂鷓叫嘯坐木杪下有垂涎蛟擇肉待一飽石屋
橫中流舟觸愁磕腦儻然一髮差敢望千金保却疑灑灑坦翻
覺呂梁好區區十八灘比並愧巫小偉哉造化功搏弄爲此巧
得非補天餘拋擲付溪潦吾欲臯真宰剗刻失蕩浩安得海神

鞭遣去守瀛島平流漾溼銀淨綠映寒藻挂席凌長風攤錢看
三老

相見坡

吾鄉隴東之六盤山森壁礙雲竦崑造漢寥籠虛岫嵯峨積岨
路若絕而復通石將頽而更綴所謂窅窈而曲剝施其高者歲
甲寅經此下車山麓挽衣荷笠而上延緣枊折肱明至禺中乃
躋絕巔俯視人馬如蟻行者想者遠近透迤陣演率然矣復盤
折而下石磴苔滑樹杪枝橫深壑小語高峰如響颯息畏佳峻
逾邾坂然埜花蔭映曲澗潺湲瀏覽忘勅今至相見坡異嶺共
雲別峰同雨恍如盤山之在我前田山薑云陟首坡則尾坡見
陟尾坡回矚則首坡見立中坡而望則首尾俱見起伏偃仰石

續黔書卷四

望

垂烟接方沈澗心突凌峯頂行者此以手招彼以口呼送響會
於咫尺而不知三十里之遙也形容可謂逼肖矣余也有客兒
之豪情江山助興無柳州之嘉藻林澗貽羞聊綴長歌以當游
記

上坡面在山下坡山在面相見令人愁不如不相見昔誦吳江
施武詩令我胸顛心滋疑今年奉檄羅施國陟坡正值芳春時
春雨霏霏泥滑滑輿夫邪許肩易疲一步一顧上高嶺遙遙樹
杪人團影須臾不見循幽坑呼聲宛如在深井斜飛瀑布崑垂
簾亂綴雜花埜照炬批頰側翼桂之樹清猿舒嘯河之麋黃犢
哀鳴鷓鴣叫下輿四望風颺颺葛藤鈎衣足欲蹶拍手嘻笑來
蹙兒椎頭鑿耳語瞽瞍似說前面石路高我曾攀絙上仙掌渺

此九牛之一毛袖攜白雲空眼界碧鷄金馬嗤王褒下視行人
相勞苦肩瘡蹄血多商賈青箬畏得夔州鹽花苗臂插藥煮弩
颯颯林風吼虓虎山王祠前煙一縷

聖泉

寓內源泉何啻億選而効靈柔祇者殆難更僕數以予稽職方
所載奇詭尤著者如滄州之澄綠泉泛金石不沈也允街之泉
水交旋如盤龍攪之亦成龍狀也廣陽之妬女泉婦人炫服靚
粧必興雨雹也霍山廟之泉鼓動則流聲絕則竭也江乘之湯
泉半冷半溫共出一壑也多喜山之雄雌泉春夏左盈右竭秋
冬左竭右盈也安豐之咄泉大叫則大涌小叫則小涌咄之則
涌益甚也是皆別具橐籥壯坤輿之觀不僅飲石上寒猿娛雲

續黔書卷四

聖

邊埜客已也而要以黔之聖泉可驗潮汐爲尤足異夫漳浦蠟
潮侯官潮泉鍾山應潮連州潮泉固亦消息有時矣然彼則地
瀕海隅緣海爲潮汐而於泉無與又若媯亭石穴池陽潮泉章
貢三潮安甯海眼樂平鳳游荆門蒙泉郴州潮泉龍場驛潮井
去海懸絕似與此泉爲伍第彼之潮候僅再至三至亦未有百
盈百竭不爽晝夜如此泉者余曾再履其地見一泓自石罅迸
出噴若玉竇泄爲瑤池淨若醜醜瑩成琉璃試以錢置石上卽
潮湧而與錢齊不湮不淺則信乎此泉之得擅聖名也宜其橫
竹引之調符取之以蠲痼滌塵珍於玉酒瓊漿可也奈人之飲
狂掬貪或且漱盜而去此若浼者亦獨何哉

附明楊慎詩

龍圖天生水義畫山出泉睠茲感沸流肇自混沌

年盈涸在頃刻消息同坤乾塵刹變潮汐億垓無質遷帝臺
漿下神漢壺嶺巔冰雪姑射質風露綽約仙竇雲騰瀟瀟泓月
涵涓涓蝦鬚穿皎鏡蟹眼瞭淪漣岷觴行游聖均舟喻思予迷
踪鬼方霧蘊真羅甸烟詎逢陸羽品那遇桑欽傳名公紆勝引
喜招陶芳筵折簡開蒼蔚飛觥延霽天玉珂鳴重巘金艾明華
田碧瀲灑柔翰翠微鑑洞絃臨淵稱混混倚谷望瑤瑤麗闔
鼓動迴溪蕢燭然荒塗欣良會興言遂成篇

續黔書卷之五

武威張澍壽穀著

貴陽熊湛英露階校刊

多雨

楊用修云北方名水為河自小而大之也黔人謂雨為清露自多而少之也余壬戌之正月入黔境即霪霖自玉屏至貴陽凡十程僅得一日晴故有漏天之號山海經曰應龍已殺蚩尤又殺夸父乃去南方處之故南方多雨郭氏註龍水物以類相感余竊謂牂柯分野上當天井是多雨潦非必如隤歎之所云也

歧舌

淮南子曰東南有反舌民注云語不可知而自相曉呂覽云反

續黔書卷五

墨

舌殊鄉之國東京賦重舌之人九譯僉稽首而來王王氏彙苑云反舌之國其人反舌元覽云軒渠之國其人四舌而三瞳通考謂之三重國拾遺記曰因霄之國人舌尖處倒向喉內亦曰兩舌重沓金筑苗狝之巢穴余代庖之日苗有訴牒者令伸舌視之宛如王子年所說蓋舌主心苗火旺於已巳為蛇故蛇歧舌南方歧舌之民其亦火旺之象也

醫方刻石

宋陳堯叟為廣南西使嶺南風俗病者必禱神不服藥堯叟有集驗方百本刻石貴州驛舍地方賴之余壬戌至黔過道旁殘碣必剔蘚等之無有也大抵年代塵邈非風雨剝蝕即沈霾蔓草否則為牧童敲火牛礪角以致毀湮耳

石刻

修文縣二里龍岡山鐫陽明玩易窩五字洞口鐫陽明小洞四字王文成貶竄時講學之地也都勻城北有石壁鐫仁智之情動靜之理棲此盤谷飲此泉水十六字張鶴樓遣戍是邦誅茅讀書題此以自慰也黔西州北六十里有方石厚潤各尺許長二尺默擡卽起語則多人不能動上鐫天合二字都指揮馬某之遺跡也貴陽東山翠巘崔嵬琳宮縹緲鐫君山讀書處五字郡人楊大賓習業之所也安平之噴珠泉鼓掌喧嘩珠璣迸出鐫喜客泉三字參政焦希程之所題也永從之石芝洞鐫石芝洞天四字副使徐九皋之所題也又皮林洞有皮林山一名過化山參將鄧子龍題過化二字寨民相傳歲以石灰填之否則

續黔書卷五

五

多病目也龍里縣南之留雲洞奇石怪壁巡撫郭子章題之曰雕雲也餘慶有古洞白雲封洞口則雨立至邑令韓任甫題之曰慈雲也龍泉非三里岩上刻天河洗甲四字劉綎平播凱旋經此勒岩也麻哈江之橋葛鏡建屢爲水決三建乃成糜金巨萬總督張鶴鳴礮碑題葛鏡橋三字也安南縣文廟旁有石方廣數丈總兵鄧子龍鐫欲飛二字於上畫寬尺許也又縣南鴉關下有飲馬泉相傳漢將軍關索至此人馬渴甚泉忽湧出成池參政林喬南勒碑池左曰甘泉聖跡也

國朝總督蔡毓榮
泐且以飲人四字桐

梓之葫蘆洞清幽深遠石狀龍蟠邑令萬侯建額曰天外賞大學士王應熊有北顧岩三字俱鐫於洞口也永甯之觀音洞有白石如龜鐫神龜玉液四字也天柱之千佛鐘鼓洞微霧濛濛

清流濺濺邑令朱梓題石曰天下第一奇洞也婺川之蟠龍洞
壁鐫蟠龍化雨四字也銅仁之東山突兀奇峭俯瞰大江絕壁
鐫雲彩江聲四大字也都勻之夢遇山有碑鐫仙人張三丰觀
瀾處八字也平越城西五里崑上有張三丰遺影郭子章於高
處鐫神留宇宙四字也遵義城北三十里石壁上鐫十二字云
山齒齒水瀾瀾白飛霞曾到此也凡此石未駁落字畫可辨皆
明人之遺跡也至遵義之白綿堡鐫石曰如能順從則世享福
壽則宋忠烈公楊燦以十訓刻石示子孫者也龍泉縣東五十
里有山高數十丈上刻仙羊巖三字相傳唐人之書也又夜郎
巖刻夜郎古甸四字相傳李白經此所題也若鎮遠之香爐崑
畔刻泝流光三字相傳爲漢武侯所題疑未能信也又永甯之
留節洞石乳凝結上有字如蝌蚪不能識也永從之碑摸崑高
數十丈上有仙書紅字又仙崑數處皆有大篆嘉靖時酉陽司
來侵地募人鏟去也畢節城北一百二十里有碑相傳武侯所
立文漶漫不可讀也此皆予足跡所至耳目所覩記者之於地
里參之以聞說信而有徵者也其他奇巖峭壁幽壑邃洞或有
秘響異蹤余恨無颿車未之到也然書不能擬岳碑文不能比
嶧山猶筆之赫鴟不忍棄者志余黔中之所得僅此也

俗字

黔南各郡民苗牒訟中多俗字亦有字書所載而音迥不類者
詢之亦有解如夆讀爲卡言措勒不與也夆讀爲擺言行止動
搖也夆讀爲戀言婦之善淫也又夷讀爲扭言以蟲置火上狀

紐動也

集韻達員切音權蟲入火貌

鳩讀為刁言人形矮短也

廣韻有為字音爵與雀同

說文依人

卦讀為絡言叫晦之斜側者也

集韻音撲塊也淮南子說林訓土勝水非

一卦塞江又普木切音支義亦同

孖讀為鴉言水之分流者也

廣韻集韻類篇並音滋玉篇云

生子也黔之古州城南有孖江車溶兩水將合處形如八字有寨焉亦名曰八孖

川字

黔之人呼牛馬之窟為春余莫知其解或又曰穿思之知當為川始信土俗方言果符訓詁之指歸也按山海經倫水有獸狀如麋其川在尾上郭云川窟也而姚旅露書引山海經川作穿是穿可訓川也又伯樂相馬經有馬白州前人亦以為當是川字

生六男

續黔書卷五

哭

癸亥二月余在會城一日晨集公廨同僚有言黔西某里王氏一胎震六男者子母咸無恙或以為駭余曰此固黔之已事也昔陸終氏娶鬼方女嬪音蒯人表作女嬪故集韻音潰大戴作女嬪一作女嬪誤久孕不育啟左脇三人出焉啟右脇三人出焉譙周輩咸以為誕以今況古知記註者不妄也而又何怪焉

化虎

黔之夷俗善變虎王漁洋記定番土司事非妄也土人言此事多有其子孫入山頗識之虎亦數往其家巡視余竊怪焉夫齊姜化蟻螭而吟帝嬪化菡草而媚宓女填海為精衛嫦娥奔月為蟾蜍是皆幽思煩冤鬱抑莫發化為異物償憤鳴情若崇伯之為黃能黃母之為大鼃杜宇之為雋周仲明之為王鮪殆又

所謂殭魂敦圉淪化俶誕者矣乃孟食裳襲而忽斑其皮鋸其牙號其聲是漆齒鏽耳之倫皆牛哀與李耳也鬚首渠股之類咸左飛與封雍也不必見蛇始以為杜預不必見蟹始以為彭越人之化也亦詭譎矣儻淮南子所謂志與心變神與形化者歟又聞夸能為變鬼法或男子或婦女變形作羊豕驢羸之屬啗人至死吮其血咽之土官重其法禁不能止或捕得輒生瘞之名曰鬼方良以是夫

博物志言江陵之猛人能化虎

呪尸為魚

西南國風土記云邪術有人思鬼者婦人習之夜化為猫犬遇病者攝其肉唾水中化為魚蝦取而貨之今黔南諸苗能以術呪尸為魚而食之亦此術也又有苗手持蛇嚼之采樵歸捕蛇

續纂卷五

完

滿籠中蛇亦不能去儻即西京賦所謂水人弄蛇者與

石棺

玉屏縣志云玉屏城西北隆萬間欽天監奏其地當產草寇遣使七晝夜猝至掘之石棺蓋半啟其人一手握髮一足踏棺勢將躍出急以銅釘釘之乃斃聞初葬時係木棺也此與汪喬年發闖賊祖墓內有金蛇鐵鐙事相類余考唐中和三年六月三日太白山人謁金州刺史檢校尚書左僕射兼御史大夫崔堯封云本州直北牛山旁有黃巢谷金桶水今大寇之帥黃巢盜據上京近已六年又偽國大齊號金統慮王氣必在此山伏請奏聞蜀京發卒破掘則渠賊自敗堯封遂與州官點諸縣丁男萬人掘之月餘山後崕崩數丈有一石桶桶深三尺徑三尺中

有一黃腰獸旁置鹿盧劍長三尺黃腰見之呦然數聲自撲而死堯封奏聞至秋黃巢果衰中原剋平嗟乎古今來巨憝大猾皆山川之戾氣鍾之安得迅霆宣威巨靈鼓斧摧深山之虎豹殛大澤之龍蛇以免新民於塗炭哉

人疴

龍里縣東門內短垣數堵華門葺斜立一人年約四十餘衣甚褴褛面頰而容有蹙左目修翹右目內有肉釘挺出長幾三寸粗如小兒臂充滿眼眶有橫痕略似麋目肉色殷紅余於壬戌十月初四日過見之爾時細雨霏霏其人負膺猶張目而睨眎也噫異哉儻卽所謂人疴者與

風鬼

續書卷五

五

風獸名似豹青色大如狸生南海大林中張網得之燒之不死斫之不入鐵錐椎數千乃死死而張其口向風仍活雲笈七籤謂以菖蒲塞其鼻卽死諒卽山海經所謂聞麟也又禽經風鳶類越人謂之風伯是風獸風鳥昔有之矣未聞有風鬼者陸次雲洞溪織志云風鬼出黔中無形無影以旋風攝人爲害余至黔輒以此問人咸云無有不知是次雲讐言抑昔有而今無也

瓜龍

黔撫署後有隙地院之人歲租爲圃藝蔬菜焉壬戌五月瓜瓞方花蔓間忽蟠結一龍如掌大蜿蜒蠕蠕之而飛動不啻眞也摘棄之復結一龍不審爲何祥後常撫軍明被劾富撫軍尼善以痢亡殆草妖云

鐘鬪

平越城南有高真觀觀旁有洞幽邃莫測內有物若牛時出見之相傳明正德間忽一夜洞外雷吼僧驚恐起錫鐘失鐘所在有頃聞鐘一路負聲而來響震林木詰朝視之凡鑿銑上下甬紐左右悉黏水草乃寤疇昔之夜鐘與牛鬪也後釁之乃止大凡物歷年久遠能為神怪水西之金雞啼月查城之石虎噬人石龍騰甲而鼓吹聞亦在普安桑木被斧而震雷至在綏陽城西橋水中悉有證驗非同俶誕矣

馬化石

貴定城南四十里有白馬山上有古池深不可測人跡罕至至則風雨晦冥相傳有白馬見於山下一黃冠呪之馬上山化為

續黔書卷五

至

石云按水經注蜻蛉縣有石豬子母數千頭傳言夷昔牧豬於此一朝豬化為石後人遂不敢牧於此然未聞有異人之跡也茲黃冠者毋亦饒初平叱石為羊之術歟大抵神仙好遊戲嚼飯成蜂也飛履化鳧也擲杖為龍也水噴紙驢肩牽茅狗也向井呼錢於盤唾獺也彈橘裏之棋渡江中之扇也是乃麻姑所謂狡獪變化也

雷擊六人

攷京房易傳云雷電殺人何雷天拒難折衝之臣也君承用節度則雷以節暴人威福則雷電殺人是則謝仙行火巨楔走精蒼旻之賞罰所以補刑戮之所不及也癸亥六月余謝病間居貴筑有自玉屏來者言月之初七值趁虛日鄉城懋易者咸集

南明樓下時天晴霽無雲忽迅雷大震雷火自樓隙穿下市人咸驚懼霎時烟散見六人仆地竅血而死樓柱失半其旁買菜傭毫無損焉後廉實其四人常沃米以水麝糝糠售之其二人則習用銅鐵白錫諸假銀以誑人者而天卒殛之使不得售其術以存其身然則人之請張爲幻倖王法之所不能及者其亦可以怵心矣

續黔書卷之六

武威張 澍壽穀著

貴陽熊湛英露階校刊

鹽

鹽曰鹹鹺伊昔官立司鹽縣設海鹽其為利博而用亦宏矣自然印成者石鹽也河淖未凍者監鹽也其名醜者南裔鹽也其呼編者蜀鹽也其稱餘者越鹽也其謂鹺者河內鹽也其名醜釀者戎鹽也其名渠展者齊鹽也最下則并州之末鹽刮鹽也其他為白為烏為紫為黃為黑為紅之異其色為苦為飴為散為形為寒石之別其味為卵為乳為駁為鳧為巨枕作桃者誤為水晶為徹子為馬齒之殊其狀正復繁賾難紀羹而調之盃而餽

續黔書卷六

五

之自不患其鹵鹵是以鹽有澤于闡滙之鹽有池猗氏販之鹽有山夔峽掘之鹽有井九龍食之黔介滇蜀之中獨不產鹽惟仰給於蜀來遠而價昂洗金之物與金爭價黔之民有不如西域之駝桂平之牛者矣儻即伯益之經所紀無鹽之國歟夫鹽之生也不擇地或出於鹵或出於井或出於崖或出於石或出於木或出於泉黔水蹄涉耳自不能熬波出素而遂洞幽崖深杳密箐固所饒也倘司事者精求牢盆之術廣募亭戶濬掘天藏而與民同味將地不愛寶靈慶志瑞鹵之驚之肴將温給則蚩尤之血可漬於蠻鄉而蛤蜊之波可流於蜚洞彼風沙者豈得獨擅煮海之功哉

茶

黔之龍里東苗坡及貴定翁栗冲五柯樹擺耳諸處產茶而出
婺川者名高樹茶蠻夷司鸚鵡溪出者名晏茶色味頗佳近俱
不產而大吏歲以爲問有司咸買他茶代餽之

論曰茶之名見於毛詩爾雅飲於漢魏盛於唐宋至今而錄而
譜而經人人皆陸羽矣嗜之者以爲釋滯消壅厭之者以爲瘠
氣耗精二者各執其說是猶邾莒小國不肯降心於齊魯大邦
也雖然金蕾珠蘂玉濤素塵香含雪尺秀起雷車采之擷之收
英歛華爲酪蒼頭代酒從事固足以滌煩清暑而不知鬪茗成
俗虛糜金錢而非徒漫肌之爲害也比見近歲上下競啜清欲
霜華甘思露液煎碧玉之乳翻銀絲之雪鼎鑪或煩於嬌女旗
槍至誤夫老兵似檜雨松風真醍醐之不若者而鄉鄙摩蜃之

續黔書卷六

五

夫尤致羨於雀舌蟬膏往往賤售新穀問西園之價希北苑之
珍廣術狹巷茶肆相連飲者肩摩足夏昕夕不絕而商旅懋遷
經山川之險博錙銖之利每以絲絹相易不知涑水雕文之難
以爲蘇蘭薪桂之娛歲費百萬仙靈莫通是以有用之物而易
無用之物也攷金史泰和五年光元二年尙書省臣並奏禁之
自七品官以上方許食茶不得賣及餽獻亦裕財足食之政也
今之留心民事者倘可踵而行之乎

女酒

黔之苗育女數歲時必大釀酒旣漉候寒月陂池水竭以泥密
封罌瓶瘞於陂中至春漲水滿亦復不發俟女子歸曰因決陂
取之以供賓客味甘美不可常得又有窖酒色碧可愛余初至

黔飲之經曰頭熱泔泔後畏之如鉤吻問諸人言此酒用胡蔓草汁漉也

革器

按蒼頡七章有鞞斃一篇言治皮之事今其書簡已逸章人職闕不復見古人察革之道矣乃滇逸鬼方竟擅絕技不知者疑以爲鬼工言不能及也有問於精手者則告之曰凡革鍛不擊則易歲治不約則易斷不盪之水摩其魄膜則無以皴澤不炙之火舒其皴粟則無以瓶張不礪以石則文理無以細皴不窸以土則鑽孔無以堅燻反是而攻焉而後削之髹之續畫之以爲鴟夷焉可以注蘭生也以爲螭盃焉可以餼嘉味也以爲棋局焉雖無雞腔之清韻而滑膩可翫也以爲馬鞞焉雖無錦障

續黔卷六

五

之光華而柔韌足珍也以及爲盥爲壺爲卮舟爲鈿盒皆足潔可尙不必鐫懸黎而鑄麟趾也不必雕沈檀而燒宣窑也列於市塵黑如純漆赤如雞冠黃如蒸棗又或縹綠葱青嫣紅油碧羊之肝鵝之血蝶之粉鹿蜀之五采繁然滿目雖邊鸞之花鳥崔蚓之蟲魚不是過也作僞者以敗紙爲之飾以漆敷以采光澤華麗猶夫革也觸之浸之不月而潰敗矣曹者不察擲青蚨與朱提是殆以皮相也

洞錦

錦之以花木名者芙蓉也蒲桃也牡丹也葵花也蘘荷也櫻桃也茱萸也林檎也芝草也阜木也以鳥獸名者對鳳也翔鸞也翻鴻也仙鶴也孔雀也金雕也鴛鴦也飛燕也麒麟也天馬也

辟邪也獅團也象眼也走龍也蛟文也龜背也虎頭也以器物
名者樓閣也蓐蒲也綬帶也銀鉤也盤毬也簞紋也魚油也博
山也連璧也雜珠也答暈也方勝也闍婆也皆所謂謂惣五色
而極思藉羅紈以發想者也黎平之曹滴司出洞錦以五色絨
爲之亦有花木禽獸各樣精者甲他郡涑之水不敗漬之油不
益是夜郎苗婦之手可與堯時海人爭妙也又有諸葛洞錦出
古州皆紅黃棉紗所織甚麤不可用

鐵笛布

永甯鎮甯二州出鐵笛布其織美似川蜀之黃潤其精緻似閩
廣之白越其柔輒似波戈之香荃其縝密似金齒之縹疊余不
知其何以織也或謂卽桐華布績白桐爲之或又謂緝桑爲之
惜未問之獐獠又有紋布可爲巾定番苗婦所織潔白如雪拭
水不濡用彌年不漬垢膩又有斜文布名順水斑蓋模取銅鼓
文以蠟刻板印布者出獨山州爛土司

金星硯

孔方平硯銘云穀理綺文金星玉質以言墨海尙潤也思州之
架溪潭產石有金銀點者可琢爲硯唐生源以一枚饋石色旣
莫之垂露匠工復未能割雲以之殺青草元易於損毫雖注以
婺川香墨之水恐不能斑采散色漚潤柔翰也嗟乎石墨相著
而黑紙筆圖臨爲章邪心讒言無得污白旨哉是論惟磨不磷
涅不緇屹然雅操之君子方露圭角非佔佔較評卽官樣鷓鴣
眼者所知也

苗刀

苗人製刀必經數十鍛故銛銳無比其試刀嘗於路旁伺水牛過一揮牛首落地其牛尚行十許步纔仆蓋犀利之極牛猝未覺也

燕麥

爾疋蕎麥郭注雀麥即燕麥有毛按即穆天子傳之楚麥內經之迦師也楊升菴以江淮所進之烏昧草當之謬矣羅鬼國禾米亦佳土人以燕麥為正糧燕麥狀如麥外皆糠糲內有芥子一粒色黃可食羣苗以此為麩每人製一羊皮袋盛數升塗饑輒就山澗調食謂之香麩其地賴此甚多古語云兔絲燕麥徒有其名殊未然也

博物志謂人食燕麥骨節斷解者亦妄

續黔書卷六

五七

羊肚菌

爾疋中馘菌郭璞云江東名土菌曰馘厨孫炎云地草亦曰地雞又有獐頭獐眼雞壇松蛾菜鵝楮雞榆肉等類皆栴香而可食黔之深箐邃洞人跡罕至往往為苗獠所踞采食山毛古樹內多生羊肚大菌潔白如雪重或一二斤食之雖元都綺蔥瀛海玉蔬干品甘露之饌百花珍藥之果不是過也余代庖古城日苗人曾獻之又有木薑實如胡椒味辛可佐食

降真香

名香多出古木若鷓鴣斑生於木坎迦南生於黑木艾納生於栝松奇藍一作男生於榕樹安息生於辟邪樹膽八生於木犀篤耨生於真臘之杉木金顏打魔迷迭薰陸返生之皆為樹脂又

如蜜沈棧雞骨黃熟雞舌馬蹏青桂八香同出於一樹黔之貴
陽府境出降真香燒之可感引鶴降醮星辰宜焚之凡宅舍怪
異疫癘及傷燒之立驗小兒尤宜帶之蓋此香在深林密箐懸
巖之古藤上人跡不到霜饗雪虐經歷歲月肉皮俱爛赤心如
鐵故其香勁而遠也以生於藤又名紫藤香云

續黔書卷之七

武威張 澍壽穀著

貴陽熊湛英露階校刊

梓枏

黔中昔饒梓枏播州水西更蕃近亦濯濯矣余至播所見拱把數株殊無巨抱者按梓亦有數種木理白者為梓赤者為楸楸之小葉者為椶梓之桐皮梓實而美者為椅尸子謂荆有長松文椅是也又有鼠梓一名椶詩云北山有椶即此木也又有虎梓江東是植枏木其樹直上若幢蓋之狀葉似桑子似杏今作枏爾雅以為枏

枏

續黔書卷七

五

房師鄧玉峰

貴陽人

先生之居花卉頗饒有樹焉秋時結實較木

瓜微大摘味之似梨而酢濇或謂即楸余按蓋枏也夫枏楸枏也李時珍曰楸枏乃木瓜之大者枏子乃木瓜之小者楸枏則

類之生於北方者三物與木瓜一類而實不同詩之木李通志略之蠻楸埤雅之木梨皆謂枏也

叩竹

昔我家博望侯至大夏得安石榴蒟醬並得筇竹賈人言市之身毒國也身毒或曰賢豆亦曰天毒漢書作天竺汲冢周書作天竹杜篤傳作天筑或作天督通志略云天竺即捐毒也田山薑以為出蜀之臨叩謬矣且謂黔亦有之更昧胥矣夫黔之所生者非筇竹乃筆竹亦作桂竹零陵記所稱桂竹之埜產桂竹

是也攷山海經雲山無草木有桂竹甚毒傷人必死竹譜云棘竹一名芳竹扶疎森然大者圍二尺可禦盜賊又交趾有築竹實中勁強有毒銳以刺虎中之則死皆桂竹之屬也余至黔中經歷數郡凡遇叢薄幽藹輒爲之拂升斤聽翁樾旁皇其下賞赤箬綠筒之修篁翫育蟲雲母之嫩籜然未見梢雲百尋摩月千尺望之似甕剖之爲甌鑿之爲船者毋亦土薄水淺霧重煙荒不能蓄此礪礪之奇節乎其萋蒨高原夢逮重谷檀欒夾水櫛蠹圍塘青嵐運帚碧空掃煙浮筠之籜上歲蕤而防露嫺娟之篠下瀟瑟而來風予也吟句對青學仙服汁納千畝於胸中傲清貧之太守非得竹王之胎鬱爲茂林何以有此平安之報哉

續黔書卷七

卒

重臺蓮

世間花卉無踰扶藁者蓋諸花皆藉暄風赫日獨蓮花得意於水月其香清涼雖葉亦自馥也周濂溪比之君子曾端伯稱爲淨友洵不誣矣余至黔聞滇池中產衣鉢蓮有赤白青三種卽梵書所謂頭波摩芬陀利優鉢羅也而玉屏署葍後饒白蓮月白風清雅足幽賞癸亥之夏印江梁秋湄明府書來言衙中菡萏盛坼香千葉三出凡六層房中攢出之花更明豔可人無慮數千朶雖太液之華萃銅池之望舒難以方矣其友人周唵虎有池中蓮詩寄余

附周砢池中蓮詩

山之盤兮中阿夫容池兮水激波待朝曦兮

花明襲高柳兮翠煙橫午風初兮雲爛含芳華兮尙舒以半望

美人兮不來芬馥
裒衷兮碧漪漣寂
莫兮誰親饒邨夫
兮弗可與鄰中惆
悵兮難言白萍飄
兮苦無根有君子
兮水之央遠不可
接兮顧瞻而襄芊
惠我兮光澤尙無
違兮我思積思積
兮情憐怕聽聞兮
夕陽蟬蒼蒼兮暮
色欲晏兮恐難息
自今兮相期永追
隨兮切莫我遺

蘭

楚詞云余旣滋蘭之九畹兮又樹蕙之百畹注蘭爲都梁香與澤蘭似澤蘭又名虎蘭譜云春蘭葉細夏蘭葉細而長秋蘭葉大而澤冬蘭葉差大葉皆不冬凋春蘭一幹一華夏秋冬蘭皆一幹十數華山蘭瘠而小建蘭肥而大了蘭最貴莖生歧枝也廣志云蕙草綠葉紫花鄭樵曰卽零陵香葉可代香非今之蘭

續今書卷七

空

審矣後人不識蘭草蘭花爲二種遂以一幹一花者爲蘭一幹數花者爲蕙號曰蘭蕙曹矣黔雖荒徼亦有燕尾魚魷披拂於長坂曲谿樵者輒隨眾草刈之以爲薪余於馬鞍山在廣順州采得六本藝於庭前聞之甚馥馥與朱子所謂葉無氣質易萎弱者迥不同乃眞王者香也爲歌離騷一章

循隱谷兮襄羊聞幽蘭兮歎香言采采兮紉佩芳菲菲兮彌章
舉紫莖兮孽綠葉羌羅生兮山之疊眎翠羽兮回翔汜光風兮
膏露接忽返顧兮浩歎公子去兮雲端無同心兮當門忌秋風
敗之兮余涕汎瀾戶服艾兮盈腰曾不知薜蘿之清高豈其未
見兮九畹實秉德之不昭藝吾迳兮豁吾扃如游蘭澤兮登蘭
亭願芳馨以自愛兮長無絕此青青

長壽草

廣順署後卽馬鞍山古樹叢林虬蟠雲結而懸崖峭陂尤饒奇草鬱鬱青青要皆神農磨脣之所未嘗壯武博物之所未志也暇日摳衣而上柔茵綠鋪斂人眉宇爰藉之賞玩見有葉舒如梅瓣者圓莖修枝枝卽抽於葉心枝各一花花分五瓣色深碧中蕊鬚猩紅亭亭蒨秀不與羣草伍問之小隸對曰長壽草也巋然異之夫員邱有不死之樹食之延壽郭景純游仙之所詠也洛陽光明殿前有長生樹二株晉華林園植長生樹二株皆樹也惟周髀算經言中衡左右冬有不死之草漢武時日支國獻活人草三莖人死者將草覆面卽活又河圖玉版云防風之二臣以刃自貫其心而死禹哀之乃拔其刃療以不死之草是皆奧窟真宅靈嶽名山乃產此嘉卉供仙夫之餐黔蠻鄉也毒霧淫霖蒸生埜莽蔓延充塞道蕘難行每思如薤氏法刈夸蘊崇之矣無論無朝虹之垂輪芳苾之戲鳳洞冥之燭夜望舒之隨時吉雲之飼織離馬日地之招三足烏卽却睡迎涼之葉護門懷夢之荻組綸布帛之英功德文章之秀概未之見顧安得長壽名葩媿瑤岩返魂之香驂瓊苑不朽之芝哉或異域音訛稱僞未可知也然聞今廣西柳州亦有不死之草如茅食之多壽此草疑卽山經之菴草云

朱草

黔南崖石之間有草焉如小桑狀枝莖似珊瑚長三四尺刺之如血與援神契之言朱草無異諒卽朱草也或据三禮義宗難

之謂王者施德有常則應德而生與紫脫靈茆皆爲上瑞安得
叢生於蠻域余按抱朴子曰今西山謔母所種之朱草頗異他
處少年湯飲輒致口鼻出血是此草可種不必其嘉祥也矧古
人嘗以之染絳乎

海棠

舊聞海棠無香惟四川重慶府昌州所產者有之余至黔聞大
定海棠極蕃其香最清烈質之士人良信

蠟樹

天下無無用之物蠶之嚙桑作繭蜂之采花爲蜜構木作羹菓
葉作醬夫人而利賴之矣又如桄榔木有麩文榲木有粉都勾
木有屑羊刺草有蜜椰子核頓遜樹有酒女國產鹽草雲南產

酸角西蜀出糖樹均足適用又波斯有齊墩果西域出摩厨子
真蠟種咸平樹亦可調羹以予所見黔之蠟樹爲尤足貴取蠟
之法於四月內將蠟蟲置女貞樹上蟲吸樹脂兩三月後漸長
如蠶遂吐蠟捲抱樹枝瑩白成片九月間採取煎熬作餅各夷
洞慣畜蠟蟲漢民亦間畜之每二三月進洞收買蟲凡一斗常
價用銀一兩四五錢貴至二兩外賤極亦一兩畜蟲亦在四月
中布種女貞樹但蟲必俟一年方收蠟則半歲可得故漢民懶
於收蟲蟲與蠟蟲蠟蟲所生共在一殼內大如豆上面赤色者
爲蟲其下稍白者爲蠟蟲一樹止可放三四顆一樹可放二
十餘顆也

續黔書卷之八

武威張 澍壽穀著

貴陽熊湛英露階校刊

孝獸

思南有甌峰盤亘銅仁思州石阡數百里騰林拂雲幽煙冥緬懸崖陡絕亢石無階杳無人居人蹤亦不能到所產草木多異狀有獸焉形類獼猴而大尾長四五尺而歧端色蒼黃鼻露向上兩卽自懸於樹以尾塞鼻或以兩指爾雅所謂雌也巢於樹老者居上子孫以次居下老者簡出子孫搜巖得果卽傳遞而上薦老者食食已然後傳遞至下上者未食下者不敢嘗先王用以繪於尊彝取其孝也按禺屬小而尾短者猴也似猴而多

續黔書卷八

畜

髯者虞也小於猴文采蔚然者果下豹也似猴而大者獾也大而尾長赤目者禺也似狄而大者果然也似狄而小者蒙頰也似狄而善躍越者獬鬣也似猴而長臂者猿也似猿而狗首以猿爲雌者獼狨也獼狨一名獾狎似猿而金尾者狨也似猿而大能食猿者獨也食猴者獼也叩鼻者狄也狄卽雌也南人名之曰仙猴也郭景純贊云禺屬之才莫過於雌兩則自懸塞鼻以尾厥形雖陋列象宗彝余廣贊曰蟻穴蜂房君臣道章鴟行雁序兄弟燕處鸞遷雞呼朋友叩須鳩摯鴛別夫婦締結惟烏能哺惟羔能乳愛深養隆曰母曰父云何蒼雌念結願復嘉果摘來爰薦耄壽嗟嗟世人誰無二親商賈逐末勞爵空陳士也遠宦鐘鼎自榮繫哉子輿益母長獻亦有周磐感懷魴魚銜索

幾靈奉檄樂胥蒼蒼者天薄薄者地罔極鴻慈豈惟酒食此而不將毛蟲之次

豪彘

物之自爲雌雄者豈爰之類鷓鴣之禽帶山之鵠鷓陽山之象蛇火眼之後猊而豪彘亦然其爲狀如豚而白毛如笄而黑端夾脾有麤豪長數尺能以脊上豪射物郭景純謂之狙猪長榻賦注謂之帚獠通志略謂之山猪唐本草謂之蒿猪亦謂之獠獠吳楚又呼爲鸞猪也大定府有之俗名刺猪苗人拾其豪以爲簪猶海嶠之用蝦鬚也聞南海有泡魚大如斗身有棘刺能化爲豪猪夫異爲魚坎爲豕異變爲坎理或然歟

水馬

續黔書卷八

奎

西域以羊臍種土中漑以水聞雷而生臍繫地內及長驚以木聲臍斷便行齧草至秋可食臍內復有種此物之至奇者也而人或未之信黔之養龍坑兩山相夾深池涵焉嘗出神馬明洪武四年僞夏明昇獻馬十其一白者首高九尺長丈餘乃得之於此也夫渥洼蒲梢余吾龍友漢史可稽已又魏黃初間於上黨得澤馬晉孝武太元十四年滇池縣河水有神馬二匹唐明皇靈昌郡得異馬於河皆水馬也隨巢子云夏后之興方澤出馬良不誣矣再考襄陽記中廬山有地穴漢時常有數百匹馬出遂名馬穴吳時陸遜復於此穴得數十匹馬出土中一異也又雲南越睽之西多薦草產善馬始生若羔歲中紐莎糜之飲以米瀋七年可御日馳數百里馬出於草更一異也庶物之生

俶詭萬變昧者不察徒執游牧攻駒曷與之循會無而涉駿馬之河哉

小羊

吾涼出封羊其背如駝高者六尺許春夏之交青草豐茂毛柔而澤三百維羣食其肉可以潤身飲其酪可以養性真俊味也余來黔中一載矣雖日飾厨傳給供驛使未嘗自求口食以快柔頤有部民饋一羊辭不獲受之不忍無故而殺養於驛內數月偶至牧所視馬輒來依衣裾間不去稱之則十三斤也按杜預奏事言魏興北山有野羊千數百斤其形不與中土羊相似廣志云驢羊似驢今黔之驢竟無龐然大者而羊復么麼抑又何歟

續黔書卷八

矣

論曰余聞之卜式云非獨羊也治民亦猶是也惡者輒去勿令敗羣式其人雖不足取而言則不易今之牧民者既不能禁觚謫之朝飲復不能如獬廡之觸邪而肉食者鄙反視羶首之民而不恤是何異狼牧羊也

箐雞

逸周書王會篇云蜀人以文鶉文鶉者若暈雉孔晁註云鳥有文彩者皋雉似鳧冀州謂之澤特今水西出箐雞高尺許或畜之見人輒避去終不馴擾而長尾白羽羽之周遭黑文緣之如淡墨所畫卽文鶉澤特之類也

人首魚

癸亥之五月鎮遠霪霖濩江暴漲上流夾岸人居埒雞宰豕悉

被冲汎鎮之漁咸駕船爭取忽洪波翻湧盤渦嵌空見一巨魚人首長徑丈鬚鬣殷紅衝網駛去予友趙子海涵自鎮遠來親見爲余言之嘗考嶺海異聞云人魚長四尺許體髮牝壯人也惟背有短鬣微紅註卽山經西海之陵亦作鯨魚也鄧元錫物性志云姑射山有鯨魚人面人手魚身見則風濤起徐鍇稽神錄云謝仲王者見婦人出沒水中腰以下皆魚述異記云查道奉使高麗見沙中一婦人肘後有細鬣命扶於水中拜手感戀而沒乃人魚也又禹治洪水觀於河見白面長人魚身出曰吾河精也夫蚨青類人首兮羅類人足戚車類人男陰文啗類女陰亦名東海夫人凡此瑰異悉產巨浸黔江何以有此如以元錫之言見則有風濤之異今夏陽侯晏瀾天吳潛蹤未嘗起魴魴而飛濤波也殊不可解

鱸魚

金齏玉膾舊稱東南嘉味六書故謂其肉毳者尤美按亦有二種脆鱸海中有之皮紫而肉厚爛鱸江海俱有比脆鱸差小而味淡玉屏之平江產鱸巨口細鱗肉白如雪不終日色不變而有四腮天生膾材也或謂天下之鱸皆兩腮惟松江鱸四腮其亦不知盧清臣者矣崑山有三腮鱸

小鱉

夢溪筆譚云關中無鱉偶收得者怖其狀以爲怪物有病瘡者懸諸戶則立瘥言鬼畏之也黔爲鬼方卽無腸公子郭索橫行彼髻首錄耳之倫且易而玩之矣余來斯邦暇則徵風采俗訪

之無有也後乃知鎮遠之鐵溪產小蠚焉與針魚沙蝦潛吻沫於澗石而鎮甯之清泉中產異蠚或赤或紫色極鮮妍雖洛水文鱗珠海石蛙亡以過也夫波斯之蠚與神鬪江南之蠚與虎鬪海陽之蠚專車女丑之蠚千里而北濱之蠚一螯加於山善苑國之蠚長九尺百足四螯尤爲足異若茲之纖纖其不能篝火以尋也審矣儻使鸚鵡之嘴肥沙熊溪而虎豹之螭擁劍牂江當霜天菊黃壺紫薑之甯酒盃都雲之香橘左持彭越右把長卿效吏部之疎狂藐監州之矜睨笑蔡謨之瞽識嗤陶穀之妄評則予也樂尊前風味忘口裏雌黃亦可以無異域之嘆矣乃冠裳之狙竟畏毒霧而不生或生之而大僅如指不足供老饕之一嚼豈不鬱哉

續黔書卷八

矣

圓蛇

圓蛇產貴州古州八萬土司中圓如卵有五彩文或山水花鳥竹木厯厯如績狀同六合石子人見之無不欣愛拾而撫摩之不忍遽舍去少頃得人氣于中心迸出一頭口目畢具舌如火輪齧人無幸免者人斃處草木枯槁泥土焦裂人不敢由此行皆迂道以避三年始復然其土猶毒苗人以竹矢插其處七日夜射人卽殪又有脆蛇長尺有二寸見人輒躍起數尺跌爲十二段須臾復合爲一田山薑紀之特詳

唧唧

山石之間有物焉形似蛙又似鮎色青味鮮美苗人得之進上客呼之爲唧唧按字書無唧字其從土者土精也宋時徐廷評

監鳳州酒稅河次得一物如小兒掌無指懼而埋之或曰此白澤圖所謂邶也食之多力按此形狀懸殊非卽唧唧也本草云石蛤在山石中藏蟄似蝦蟆而大黃色能吞氣飲風露可食疑唧唧卽石蛤之類

九香蟲

余髦年在外馬足車塵間關萬里得勞疾恨無罽蘇之我遺也目見潢池弄兵毒虬潛歛黔首流離得痛疾恨無草荔之我惠也改官於外無吏才牒訴恹憊敲撲喧囂耳遂以聾恨無文莖之見贈也民譎觚而苗剝悍上下齟齬是非區霧憤放手者之類越貨也則忿之甚思得帝休服之握符衝塗曰惟夫馬船雞豕鳴之是急無瞬晷展卷幼時所誦經書茫如夢寐是爲忘疾

續黔書卷八

究

思得迷穀佩之時復勘地巡稼登峻岑冒毒霧飲食不時得痔疾誰則投我以赤翁之櫟烏蛇尾之虎蛟者兼此六疾百里何堪乃者掛冠引退囊無阿堵甑無洗耙饑腸時作鐘球鳴也暇輒覽列仙傳慕葛稚川之爲人便有意餐霞吸氣凌飛上泚又念夙無仙才未必有仙骨私覬遇羨門安期食我以青精飲我以益漿庶蝸甲於濁穢茲聞畢節之赤水出九香蟲服之身輕喜甚詢之士人言蟲生澗水中春夏出遊水面者不可用秋冬潛伏澗石土人掀石得之售人服法用十四枚將七枚微火炒去壳翅及足七枚去壳翅足生用每服一生一熟作一次嚼食白湯下日服二三次俱可用完十四枚而止倘余得是蟲也不羨句漏之丹砂矣或曰服之尤宜子云